

ASO LULU, 22 IANUARI 2020

Na toe faaauau Taulumaga a le Fono Aoaofaitulafono i le itula e 6:00 i le afiafi.

Na toe faaauau felafolafoaiga i luga o le faitauga faalua o le Tulafono Tau Faaofi o le Faatatauina o Tupe Faaopoopo (Nu.1) 2019/2020.

SUI FOFOGA FETALAI: Ou te faasilasila atu, ua toe amalia nei Taulumaga o le Fono Aoaofaitulafono. E faataatia ese galuega a le Fono Aoaofaitulafono i le aoauli analeila, o saunoa le sui usufono mo Anoamaa i Sasae. Ou te tapa le sui mamalu e tulai mai e faaauau lau saunoaga.

Afioga ALAIASA MUAGUTUTIA MOEFAAUOUO MALAGAITUTOGIAI SEPULONA MOANANU: E ao foi ona ofo alofa atu ma faatalofa atu i le paia maua o le Maota i Tiafau nei. O ou paia ma sa ma mamalu i Tiafau, e tumau lava e oo i le faavavau. E pei lava ona faafofoga mai foi le atunuu o taumafai atu se manatu o lenei usugafono. Ou te le i oo lava i se faatalofa foi i le paia o le atunuu i le taimi ua sola. Ae avea ia lenei taimi e faatalofa atu ai foi i le faafofoga mai i Le Ao mamalu o le Malo, Sui o le Fono o Sui Tofia ma paia faalupe o le tatou Malo tutoatasi. Faapea foi le tapuaiga mamalu a le aufigaluega totofi a le Atua i Fata faitaulaga e fia. Ua ou toe pai atu ina nei fai ma lape o le matou tautalaga.

Ae faapea foi le paia o Samoa mai lava i ona mauga tetele, afio o aiga, tama o tama ma aiga tainane foi le usoga a Tumua ma Pule. Tapuai maia ma le manuia se i faaauau le faamoemoe o lenei itumalo aua sona sao i lenei foi faamoemoe taua ua tatou i ai.

O le mea moni lava ana leai faalavelave ia na tulai mai i le taimi ua sola ma le malama ua alu atu se manu ua uma lau lauga, ua leva ona ou fia malolo foi i lalo. Aepeitai ane o lea ua aumai ia latou,,,,,e pei ona saunoa le Minisita o Galuega e le o auala e toe sau ai i le palota. Ae taua lava galuega. O le mea lea o upu tatou te o atu olegia ai toeiina. O le matou nuu e i ai le toeiina matua la sa i ai, e nofo la le toeiina, a oo i le taimi e faamasino ai le nuu i amio faaletonu a le nuu. E faalogo atu loa le toeiina i tali a le aualii ia, na ona faapea atu lava o le toeiina, ua e vaai atu i le tala lea. Ua e toe vaai atu i le isi tala lea, o pepelo pepelo toeiina ia e nonofo mai. E te le i pepelo mai ua leva lava ona iloa e

toeaiina o la e te pepelo. O le mea lea lau afioga i le Minisita o Galuega, na ona matou tuutuu atu. Ua lima lava tausaga o le tali lava lea, ia e alofagia se i tali manaoga o si o matou itumalo. O lea ua tatalo mai lo tatou atunuu, e pei ona matou fai atu.

A ou vaai lava i le tupe lea e maua e le LTA, e 40,000 taavale lea ua iinei i Samoa, aua e te iloa i laisene numera la ua oo i ai, o taxi o taavale a le Malo, ae faatele i le 200 laisene i le tausaga e tasi. E \$20miliona le tupe lena. E leitioa a naunau le malo e aumai i totonu o le tupe a le **traffic** aua e leiloa po o fea o faasoa i ai le mea lea. Pe a o tatou o i fuainumera. Na ona matou tatalo atu, ona o lea e matau lava ma tatou savavali lava i le faiga o le tatou atunuu. Leitioa faafetai foi ua toe aumai ai i i. Sa saunoa foi le Palemia e tatau ona amio tausaaafia, ua ta fiu foi e tau fai lenei mea o le tausaaafia, o isi foi taimi e faapea toeaiina ua e tau faavalea, lou ataata soo, Ae pau lava lea toaga e alu e fai finagalo o toeaiina, toaga e tautua le nuu, aua a le faia loa mea ia, o lona uiga e i ai isi faamoemoega o le tupe. O le a o atu e faatau le palota, e pau lava lea o le mea i le olaga lea o le a tatou i ai, o le a money loa le mea. Ae o le mea e lelei ai.

FOFOGA FETALAI: Malie le sui usufono o lo o saunoa se i tulai mai le Palemia

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fetalai, na ala ona ou taua le toeaina o Alo, o Alo tonu lava o le tou nuu lea na alu i le palota. O ia la lena na aoaia au, e te iloa, se tausaaafia, o lea la ou te faamanatu atu i le sui usufono, o le toeaina o le tou nuu lea na aoaia au, ia tausaaafia. O lea la ua ou tuliloaina oe, e te manatua foi Alo, aua o le tausaaafia lena na maua e Alo, na maua ai e Alo lana tasi le palota. A o ia lea na fai mai ia te au. Lau afioga i le Fofoga Fetalai, e tele mea e faamasino ai ia tatou e le itumalo. E le na o se tafa tasi. O lea la ua toetiti 40 tausaga o ou iai i totonu o le Palemene. O isi sui o le vaega lenei na pito tele ona fai a latou mea, e le i toe foi mai. O lona uiga, e ese lava mea e agai i ai mafauauga o tagata. Lau Afioga i le Fofoga Fetalai e le tafa tasi.

FOFOGA FETALAI: O lea ua manino auofala, ae faaauau le saunoaga a le sui mamalu.

Afioga ALAIASA MUAGUTUTIA MOEFAAUOUO MALAGAITUTOGIAI SEPULONA MOANANU: E sao lelei lava le Taitai o le Malo, o le toeaina lea na o ma lou tama i le palota. E tausaaafia mai ai la ia, ae sili atu lou tausaaafia i le taimi lena na malo ai le toeaina. O le mea la lena e eseese ai le tausaaafia ao si toeaina lea ua maliu, ua fai i lagi lana folauga. Ae tasi lava lana palota na maua, e oo lava i lona toalua e le i palota i ai. E leai sau faasea na faia i le

falepuipui, na ou aumaia le agaga foi lele, o lea e tele tupe, lena na maua i totonu o le tatou paketi ma le Tala o le Tupe, o tupe e fai ai le falepuipui. O le mea lea, e ese mamao lava le mea na oso mai ai le Minisita lea, ua le tausaaafia lana mea lea na fai. O le mea lea ou te faamanatu atu i le Minisita, se o le mea lena e foa ai o le oso fua ia le misa a le isi aiga, ae le tapuai lelei. A tatou vaai i le falepuipui, e taua, ou te alofa foi i tagata... i tupu ma tamalii o la ua faaunuua i le toese. A o aso ia i le atunuu, o tama ia e le toe i ai ni aia ua sala, o le mea sao lena sa i ai. A o mea sese ia a le UN o lea e o mai ma fai mai e tutusa aia uma a tagata. E tutusa le aia a le tagata amiolelei ma le tagata amioleaga, o lea o le a tele ai le amioleaga i le lalolagi. O lea la ua tatou oso ma tatou ia, tau matimati mai le aufaaletonu ia, ae tiai tagata amiolelei la e tau atiae o latou aiga i nuu i tua. A ou matamata i le faiga foi o lenei galuega. Se e ese a foi uiga, e tai pei lava o le 2011, e ese lava foi le faagasologa ma le faagaioiga o nei mea. Leaga e matau e tatou galuega nei ma mea nei. O le mea lea e fai atu ai, e leai sau tala leaga na faia i le falepuipui, ae o le a te i ua aumai ai fua, e pei e foliga mai ua ou faasea, e leai, o lea na ou talanoa e tele tupe maua a lo tatou atunuu, lea e maua i totonu o.....

SUI FOFOGA FETALAI: Malie le sui usufono o saunoa, se i tuu atu lava le avanoa i le Minisita o Tupe Maua.

Afioga Hon Tialavea Fea Leniu Tionisio Hunt: Faafetai i lau Afioga i le Fofoga Fetalai, e sao lelei le saunoaga a le sui usufono i le saunoa mai e faapea e tele tupe. E tele tupe o lo o maua e le Malo. Ae ua sese le faamuamua, fai le falepuipui ma le taaloga o le Pasefika i Saute lea na fai talu ai nei. O lena e i ina faamaumauga, lena na ala ai ona ou tu i luga. O le faamuamua a le Malo, ne i te i ua faapea toeaiina ma loomatutua la e faafofoga mai, ua ave le faamuamua i le falepuipui. E leai o lea e ave i aoga ma le soifua malololoina o le atunuu. O isi mea ia e faapea mai o le 2011, ou te le malamalama lau Afioga. E pau na o le mea na ala ai ona ou tu i luga, e fia faamalamalama le mea lea e ave i ai le faamuamua a le Malo, e le o le falepuipui, o le soifua maloloina ma aoga, o lea e Minisita lagolago ai le sui usufono.

FOFOGA FETALAI: O lea ua maua e le laulau.

Afioga ALAIASA MUAGUTUTIA MOEFAAUOUO MALAGAITUTOGIAI SEPULONA MOANANU: Ou te musu e fai se faafinauga i nei mea. A aumai nei a tatou faamaumauga i le aso a taeao, Hansard, ona toe faitau lelei lea i ai o le Minisita i lau tala sa fai. O lea ou te malamalama lelei lava i ai, ae e leai se agaga ia te au e faaleaga le atinae. A faaleaga le atinae lelei. E aoga mo le atunuu, o le falepuipui. Tau faafofoga lelei mai i manatu ia e avatu. O tupe foi nei o lea foi o le a tuuaia faapea ua ou faasea i taaloga a le Pasefika, o le a

faasea o le Matagaluega lea sa vaai ma faatino le taaloga. E pau foi lenei o le taaloga, leaga sa inaina mai foi le isi sui fai mai. E pau lenei o le taaloga o lea ua aumai le \$5miliona i le tala o le tupe. Silasila la i ai i le faafoega o le mea. E lelei faafoe, o lea ua vaavaai i ai. O le mea lea e fai atu ai, ou te lei teena, e le i faia sau tala faapea i taaloga. O lea ua tatou fiafia uma ai, a tatou toe talanoa i na mea, e pei ua tatou faoa le viiga o le Atua. O le mea lea, o le a see i luma se faamatalaga a lenei itumalo. Lau Afioga i le Minisita o Galuega, e le toe tele sau tala i le tulaga o le atinaeina o lo tatou itumalo. Na umusa lata mai nei le isi matou auala, e ese le tali fiafia e lenei itumalo. O se mea muamua lenei i le 50 tausaga, 50 tausaga talu ona faavae le atunuu, faatoa oo lea o le matou nuu o Falefa i se tulaga faapea. Vaai i le tali fiafia mai o le nuu e talisapaia le tatou Malo. E uma atu le loto o Samasoni e leai se mea na maua ai, ae o atu i tua, manaia le taliga o le tatou nuu o Falefa, o le faamoemoe o le tatou Malo. E fia miliona lea e alu ai i totonu o Vaimauga, fai ane lea mea fai ifo lea mea. A o i lea e elieli mai ai le pau o le Malo, o i i Vaimauga i Sasae ma totonu o le taulaga. Ae ui i lea fai pea atinae.

Afioga Sulamanaia Fetaiai Tauiiili Tuivasa: Malie lau Afioga i le Fofoga Fetalai, o se mea e fia faasao.

FOFOGA FETALAI: Malie le sui usufono o tulai mai o Vaimauga, ou te le talia le...e ese lava le faauigaina e le sui usufono, e leai se mea o afaina ai.

Afioga Sulamanaia Fetaiai Tauiiili Tuivasa: E le o Vaimauga i Sasae lea na faatino ai le auala laupapa o Vaimauga i Sisifo. Leaga o lea e faafofoga lou itumalo, mo le faasaoga o faamaumauga. Ona o lea e saunoa ia Lufilufi o Vaimauga i Sasae. E leai e le i oo lava se mea ia Vaimauga i Sasae. Mo le faasaoina o faamaumauga o Vaimauga i Sisifo lea na faatino ai le faamoemoe lea i le auala laupapa.

FOFOGA FETALAI: O le ua faafofoga mai le sui mamalu o saunoa, o lea ua toe faasao ma faamalamalama, o Vaimauga i sasae.

Afioga ALAIASA MUAGUTUTIA MOEFAAUOUO MALAGAITUTOGIAI SEPULONA MOANANU: O le Vaimauga lava o le Vaimauga. Ae ui i lea faamalulu atu ia Tuisamau, sa ou faapea e vaai mai o Lufilufi lea e pau le susuga, sa tatau ona tapuai filemu. Se i i ai foi sona taimi, na o le tapuai lava ma tatalo pe a lauga le sui. Ae ui i lea e faapena se lagona. E pei ona matou talanoa atu, e le umi, e pau lava lea, na o fautuaga lea na tuuina atu i le Afioga i le Minisita, ia tautuana ma ia, se i toe vaai lelei a tatou....o le mea lea sa ou talanoa ai i le leva o le **plain field**, ia o tatou ia e leai ni tamaoaiga tele, ma i latou ua faulai le tamaoaiga, tatou taaalo lelei i le tatou palota, aua le taalo

leaga. Leaga e i ai le isi toeaina foi lea e ese a lana puega o tagata i le vaitaimi o matou ma Loau, e vaai lava ia i luga e le vaai i lalo i vae, e pue lava i luga i le mea e taotooto filemu ai. Ia, le tapuaiga a le paia i Aiga, Aiga Sa Fenunuivao ma Aiga Sa Alaiasa, Aiga o lo o i ai le Tuiatua faasaosao Tama Malili e fa, le Aiga Sa Alaiasa, na saili lona fale Atua i lona aao malosi. Ia faafetai i la outou tapuaiga, ia oulua Matua Iuli ma Moeono, le tofi faasolo o le aai, o le aai o le tupu, o le tagata o le Tuiatua. Ia, faamalo faafetai i la outou tatalo. O lea tatou te feiloai pea lava pea, aumai foi lo outou finagalo aua ni mea e atiae ai lo tatou itumalo aua le manuia o tagata.

Ia, le tapuaiga foi aua le paia ia te oe le Tumua Lufilufi, faafetai. Le Toaono ma le Saofaiga, Tupai ma Seutatia ma le mamalu ia te oe le Tumua, le Tumua numera tasi ia Samoa, aemaise ou fuaiala, le matua ia Ki ma Tagata, Tai ma Fonoti, faamalo le tapuai. O lea ua ave le tatou talosaga i outou auala, ia amuia le nuu lea i uta i Manunu, e fai o le alu atu i Sauniatu o lea ua tatalo le sui usufono mo Anoamaa i Sisifo, a o lea foi o le a toe oso atu i le isi itu ma fesootai, o le a manuia faasoloatoa le tatou itu. Ia alofa mai le Atua i le tatou Paeaiga, e moni lava ua tatou i ai i le siui o lenei malaga ma le tatou Paeaiga, a o lo o i ai lava le maatui ma le maagao ma le maa faalavea aao, ia alofagia e le Atua ia faamamao ia fatia, ae aumai ona manu tatou te folau ai. Afai foi ua i ai se pati ua sala a o se gagana ua le tautamalii i la outou faafofoga le paia o le Maota ma le mamalu o Samoa o tapuai mai, ia, e leai lava se tagata e i ai sona atoatoa. Matou te asuasu atu vaimalu i puega ma faamalulu atu, ia foi mai se tala a Lufilufi pe afai ua sala se matou gagana. Ia faamanuia le Atua i toega o lenei afiafi, i le suafa o Iesu, Amene ma Amene.

SUI FOFOGA FETALAI: Malo saunoa. Ia o lea ua pau le susuga Lufilufi, ou te manatu foi o lea ua faafofoga lou itumalo, tatou ave i uta. Tulai mai le sui usufono mamalu mo Aiga i le Tai.

Susuga MULIPOLA LEIATAUA LAKI: Lau Afioga i le Fofoga Fetalai, e ofo alofa ma faatalofa atu i lau Afioga. E faatalofa atu foi i lau Afioga i le Palemia, lau Afioga i le Sui Palemia, le mamalu i le Kapeneta faapea le paia o lenei Palemene. E faatalofa atu foi i tupu ma tamalii o tootoouli ma tootoosina o lo o tautuaina le Malo e ala i Ofisa Sili o Pulega o Matagaluega faapea foi Ofisa tumaoti o le tatou Malo.

E faatalofa atu i lau susuga i le Failautusi o le Maota faapea foi lo outou Ofisa mamalu le Ofisa o le Fono Aoao Faitulafono, faamalo le lagisoifua, malo le lagi matafitafi i lenei vaega o le aso. Ou te manatu o le a ou le toe asaina le vaofilifili, o le a le toe ta foi i tua se faamatalaga aua o lea maea i le taeao ona e alaga le galu ma sisi le atu a le tautai, o lea foi ua maea ona e faamanusina ma tapui, o lea ua alava ai auma o le samiuli. A o le tala foi e fai i le vai i le mategasau, a magalo ma sua manino, ona togi lea o le aute o le fanua ae apo le pua o vasa. A o le

tala e fai ia Ao ma Po, Po ma Ao ma lo la fale e tulutuluitao, a lele ua soo ona taiao. Pau o le maota i Tiafau nei, maota o le faautugatagi, a lele ua tapuvaetasi i ai paia ma mamalu o le atunuu. E pei lava ona ou fai atu lau Afioga i le Fofoga Fetalai, e le toe tuutuu mamaoa se faamatalaga, ou te manatu ua vela le fala. E i ai foi le talitonuga e le oo se tala i le Tala Faaopoopo o le Tupe, ae na pau lava lea o le mea sa ou fia faalogologo i ai, seia maea mai le itu le la, ma agai atu foi le vaega lenei. Aua o ai au a ou toe lauga ai i le Tala o le Tupe na ou tapenaina. Malo faafetai, se ua taliga e fialogo le mauga i Matautia i a outou saunoaga i lenei aso, amata mai ananafi, o lea o le a ou le tali atu. Ou te masalo faatoa ou tali atu pe a oo ina fai le tatou Tala Autu o le Tupe ia Iuni, a o lea ua tapena le Afioga i le Minisita aua foi le tele o outou manaoga ina ia faatupe mea ua outou finagalo i ai.

SUI FOFOGA FETALAI: Ia faamaea mai loa le lauga pe afai o le agaga lea. Faafetai le faamamaavega i le Nofoa.

Susuga MULIPOLA LEIATAUA LAKI: Malo le faatoatoa i lau Afioga i le Fofoga Fetalai. Se e ese lou aulelei pe a oo ina e seei mai le Nofoa, malo le fai o le faiva. Ou te le selu atu. A o le mea moni lau Afioga i le Fofoga Fetalai, pau lava le agaga na ou fia tulai ai, se i fai se faafetai i lau Afioga i le Palemia ua leva ona tatou tapisa i tulaga pei ona i ai le aafia o le tatou atunuu i le faamai o le misela. Na nofonono foi ma matau aluga o le Maota, ma o le mea moni, e leai lava se isi o tatou e le i suia ni lagona i le taimi na aafia ai le atunuu. Ae malie i le faalogologo i le saunoaga a le Afioga i le Fofoga Fetalai, afai sa tatou galulue faatasi, o le mea sili lea ona taua. O le ala lea e molimoli le faafetai i le Afioga i le Palemia, se a e saunoa o le saunoaga lava e fafagu ai le tupu na tofa i le Maota. O le sunoaga e faatusa e faatusa i le nofoa vaevaloloa o le Malietoa e faalogo i ai Samoa. Faamalo le fai o le faiva, e le faigofie. A lea ua... se e aoga foi mea o faamai ma mea faapea e oo mai, o lea tatou te iloa ai le lava tapena e le gata i le tofa faasau ma le tofa tatala, a o le tulai mai. Lea a na tatou molimau, e leai e le i tausi mamalu lava, sa tu lava ma fai le galuega. Faamalo le galulue i lau Afioga ma le Kapeneta ma le paia o le tatou Faigamalo. E sao lelei lava le Afioga i le Fofoga Fetalai, o le tasi foi lenei o sui usufono sa tulai malosi logo le nuu, logo pulenuu. O le mea foi lea sa ou tatalo malosi ai i le Afioga i le Minisita se i avatu se matou sui tamaitai, ioe. Aua e ova ma le 5,000 tagata o le matou nuu i uta, ae na o le sui o le Malo, sui o alii ae leai se sui tamaitai. Ia o lea lava la ou te galue faa-sui tamaitai i le tele o taimi, galue malosi, totogi pasi ma aumai taavale a le nuu se i lau tagata e ave i le falemai. Ia o le tele foi o taimi e moni ua na ona tatou tapisa ae a oo i le taimi, ua tatou le o e faatino le pitolaau lea, o tatou lava o tautua matavela o le atunuu aua alo ma fanau i taimi e lofia ai tatou i faamai. Ia ua matau foi pei ua tau atuatuvaale foi le Maota i le tele o taimi, a o lea e manino lava Afioga a

le Atua, o ona aso e oo mai ai mea faapenei, o faamai, o mala, o lologa ma mafuie, o faailoga ia. A o lea e i ou autafa le susuga i le failauga ae le i lauga i vaega ia sa tatau ona faailo manino vaega ia ina ia nofo lelei le Maota. E pei ua tau siisii ona ua tau polepole foi, ae leai o vaega ia e faamanatu ia tatou ma tatou tapenapena, e leai ua lata mai le aso o le Alii. Afai foi e mamao, ia e le iloa nanei pe a. A o le tala e fai i le Falesalafai ma le Alataua, sa tu i Fagalilo le Tapaau o le Alataua. Sa lilo lava i manatu pe tatou te aulia lenei aso, ae viia le Atua faafetai. A lele ua alu filemu le misela, a o lea e lagimaina lau Afioga i le Fofoga Fetalai faapea le pau o lenei Maota. O le mea lea faamalo le galulue.

E le itiiti foi le faafetai i si o matou nuu ma le itumalo o faafogafoga mai, ia e le talaole le tala pei ona ou avatu, sa galulue le nuu ma le itumalo e faatino le avega o alo ma fanau aua le taimi o tuiga. E alu atu la i tua le misiona lea na alu atu a le tatou Malo, ia ua tuutiitia e ui lava foi sa faalavelave i nai fomai i le tele o taimi, ae a faaalua lava le naunau aua o isi vaega ia o le tatou tusaafia o le tu i luga ma savali, tu i luga ma momoe. Ioe. Pe leai lava se tupe i lau taga, ae a e momoe lava, e leai se tusaafia e sili atu.

Lau Afioga i le Fofoga Fetalai, o le agaga lava ia e le fia sii soo lou vaa, leaga e masani i le mea o le vaa ae sii soo, e lua a mea e i ai, a le fai o le le toe foi mai, o le fiu e faatali ua alu atu lava ma alu atu ai. A o le agaga e tau asusu atu i lenei afiafi, o le mea moni, o le upu lava e fai, afai e eligata le eleele, o le fesili, e mafua i se a? O la e i ai le auro. Afai e tofugata le alititai, e mafua i se a? O la e i ai penina. A ausiagata le vateatea, o la e i ai malu. A sufigata ma faamoemoe o le au kerisiano, e mafua i se a? O le ola e faavavau, e vaapiapi, e vaitiiti. E faapena lo tatou ola tautua aua le tauatiaeina o le tatou Malo. Ae faafetaia le tamaoiga, e ese le faigofie. A maua lava le suka ma le lautu a le olomatua ma le toeaina, o le faailoga lena o lo o lelei le tamaoiga o le atunuu, leai se falolo ma se fia ai, leai se mativa, o lo o molimauiua lava. E ui lava ina tatou ola i aitalafu, o le faiga lava lena o le mea. A le aitalafu e le ola, a le aitalafu e le mafai ona faatino a tatou feau ma galuega ua alu ai le aso ananafi ma lenei aso.

Ona faapea lea lau Afioga i le Fofoga Fetalai, o se taimi amuli i le ogatotonu talosia i le alofa ma le agalelei o le Atua ona oo lea o se faamatalaga se i faafetaia galuega fai a lo tatou Malo, ina ne i ou faafetai nei ona ofo lea o le Maota lenei i le anoano o galuega ua maea ona faatino. A o le matou tatalo, ia i ai le agalelei o le Atua i lau Afioga i le Fofoga Fetalai, maua le tofa, maua le uta aua foi le faatautaiga o le nofoa o le tatou atunuu. Maua le soifua manuia ma le tofamamao i lau Afioga i le Palemia ma lau Kapeneta faapea lenei Palemene ae sili ona soifua maloloina tupu ma ee o lo o tautua lo tatou atunuu e ala i ofisa e fia o le tatou Malo.

Ia, lou itumalo, ia i ai le agalelei o le Atua, e talitonu lava e le o tuulafoaia faiva o la outou auauna, o lo o po lava le fala ma ula le mulila e pei o le tala e fai i le vaa o le Tagaloa. O lo o tui le mulipapaga

ma tapuaia faiva, ua mafua ai ona maua so matou manatu, a o se malosi e faataunu feau ma galuega o tofiga ma valaauina. Faamalo.

Le paia o Aiga e Lua, Usoalii ma Alo o le Malietoa, Ati ma Lautolo, tainane le susu o Sau, Lilo ma Usoalii o oe na faletolu i ai Manono, Sauma aemaise le paia i le toafa o alii ma le toalua o Tulafale, Luatutu ma le Alo o le Malietoa, faamalo le tapuai. Aua tatou te popole, e faiaso lava le Atua, le faaso a le Malo, o le faaso e lufilufilimalelei, e i ai lava le taimi e oo atu ai le faaso. Ona faapea lea o sa matou tala, ia manuia le tapuaiga a le paia o le Au Sa Levi, e o lo o nonomanu ma tatalo i outou maota lilo aua se manuia o Samoa nei ma a taeao. Ia manuia lenei aso. Soifua ma ia manuia.

SUI FOFOGA FETALAI: Faamalo saunoa. O lauga faatamaitai, o pae ma auli aua le aso ma le faamoemoe. Ia, tulai mai le sui usufono o Vaimauga Sisifo Nu.1.

Tofa LENATAI VICTOR FAAFOI TAMAPUA (Vaimauga Sisifo Nu.1): Faafetai i lau Afioga mo le avanoa. Ae muamua ona tapa tulia i le tata, i le mua ma le faasagi e sula ai le alofa ma le agalelei le motusia o le tatou Tapaau i le lagi ona o lana tausiga, lea ua maualuga ai le aoina o le masina i lau Afioga i le Fofoga Fetalai. Afio foi le Afioga i le Palemia, Sui Palemia ma le Vasega o le Kapeneta ma sui usufono mamalu uma o le Palemene o Samoa, ae tainane foi le susu o le Susuga i le Failautusi ma le aufaigaluega o le Ofisa o le Fono Aoaofaitulafono faapea foi Ofisa Sili o Pulega o Matagaluega ma Faalapotopotoga ma Ofisa Sinia, malo lava le fai o le faiva. Malo le soifua maua ma le lagimama i lau Afioga i le Fofoga Fetalai ma le tatou Fonousu i lenei taeao na liugalua.

Lau Afioga i le Fofoga Fetalai, e pei ona folasia le Tala Faatatau Faaopopo o le Tupe, ia ua i ai se lagona o lenei itumalo e fia faatagai foi se tupe a lenei itumalo, aua le taulafoga i totonu o le Maota nei mo se lumanai manuia o Samoa mo a taeao. Lau Afioga i le Fofoga Fetalai, e muamua ona fia faafetaia le Afioga i le Minisita faapea foi le Minisita Lagolago, le Ofisa Sili o Pulega ma le aufaigaluega o le Matagaluega o Tupe ona o le tapenaga matagofie o folaga manino foi sa saunoa ai le Afioga i le Minisita i le Tala Faaopopo o le Tupe, ua faigofie ai ona faapea atu ai lou nei tagata e fai ma sui o lenei itumalo e lagolagoina le Tala Faatatau Faaopopo o le Tupe.

Lau Afioga i le Fofoga Fetalai, mai lava i le aso ananafi seia oo mai i lenei itula, sa faalogologo i manaoga foi pei ona tuuina mai i le tele o sui usufono. O lenei itumalo, o se faamatalaga e fia molimoli atu o le agaga faafetai i nisi foi o kamupani ma e foi ua agalelei mai i le itumalo. E muamua le faafetai i se tasi o kamupani lau Afioga i le Fofoga Fetalai lea sa maua ai le fesoasoani a le itumalo ae talitonu o lo o silafia e lau Afioga aemaise foi o le Afioga i le Minisita Lagolago, le Tamaitai Pule ma le Matagaluega o Tina ma Tamaitai, o i latou ia o lo

o taulamua i se tasi o polokalame o lo o faapea ona avatu i tua i nuu ma itumalo, o le fausia lea o ni fuafuaga faataatitia mo itumalo taitasi. O Novema 2018 lau Afioga i le Fofoga Fetalai, lea sa faalauiloa ai le fuafuaga a lenei itumalo. Ia, a o le vaega muamua o lo o ave i ai le faamuamua a lenei itumalo, ona manaoga o lo o i ai, o le ola soifua maloloina lea o tagata i totonu o le itumalo. O lea la ua tali mai se tasi o kamupani tele i le tatou atunuu e fesoasoani mai ai i le itumalo e mafai ai ona fesoasoani i faafitauli o lo o feagai ai ma ia maua ai le soifua maloloina. Lea sa fesoasoani mai ai le kamupani i mea faigaluega aemaise foi vaega uma e mafai ai ona fai ai togalaauaina o aiga, nuu aemaise foi o totonu o ekalesia i totonu o ;e itumalo. O lea lau lau Afioga e momoli atu ai le agaga faafetai i le afioga i le tamaitai pule le Afioga ia Seulupe ma le Ofisa o lo o faapena ona gaosia po o le kamupani o lo o gaosia ai le tapaa i totonu o le tatou atunuu.

Ia, e fia momoli atu foi le agaga faafetai, ou te talitonu o uiga tausaaafia o le Afioga i le Minisita o Aoga, ona o le lagolago i le talosaga foi a lenei nuu ma le Komiti o Aoga a Moataa i le talosaga ia Iapani mo se faleaoga fou. Lau Afioga i le Minisita, o lea ua tali ma le manuia Iapani, o lea ua maua le seleni o le a faapena ona fausia ai le aoga tulagalua i totonu o Moataa. E faafetaia ai foi i lea vaega lau Afioga i le Fofoga Fetalai le tamaitai pule le Afioga ia Sua Julia Wallwak ma le Ofisa o le ADRA i le latou foi fesoasoani o lea ua ofo mai aua foi lenei faamoemoe mo le aoga tulaga lua a Moataa o le a faapena ona fausia.

Lau Afioga i le Fofoga Fetalai, e tonu lava Manua ina ua fesili. O lo o i ai le vaega lea le polokalame lea o le GCF po o le Green Climate Fund, ia o le Afioga i le Minisita ma e o lo o faauluulu i ai i lea vaega. E talitonu o le fund lea o lo o i ai le upu lea o le climate. I lenei vaitau lau Afioga pei ona tatou molimauina i timuga ma savili malolosi, ua maua le faamatalaga lau Afioga o lo o i ai le seleni o lo o faapea ona faaagaaga mo Vaimauga Sisifo, pe tusa lea ma le \$5milion tala Amerika. Ua maua foi le faamatalaga o lea ua maea le taamilosaga muamua mo talosaga mo vaegatupe ia, o lo o tatala le avanoa i aiga, o faalapotopotoga ma pisinisi i totonu o itumalo e talosaga mo se vaegatupe e fesoasoani i se mea o lo o fia faatino ai se latou poloketi. Ia, o lea ua maua mai le tali, e i ai nisi ua faamanuiaina, a o le toatele o lo o faanoanoa. Taatia lea vaega lau Afioga, a o le tatalo i le Minisita ma e o lo o faauluulu i ai lea polokalame, pe le mafai i lalo o ni aiaiga o le faaaogaina o lea tupe e mafai ona tali mai i nisi o talosaga ua faapena ona faaulu atu i Matagaluega e auala atu i Afioga i Minisita i ni mea o lo o fia faaleleia i totonu o itumalo, ona o aafiaga i le suiga o le tau.

Muamua lau Afioga, e pei ona saunoa foi le Afioga i le Palemia, o le itumalo lenei o Vaimauga, e vaia lava, e iloa lava i igoa o lo o faaigoa ai nuu, ia po o Vaimauga, e amata i le vai, o Vaipuna, o Vaiala, o Vaisigano. Pei o le talosaga lea e avatu lau Afioga i le Fofoga i le Fofoga Fetalai i se vaegatupe lea e mafai ona fesoasoani. O le vaega

muamua lau Afioga, o i i luma tonu lava o le falesa EFKS i le mea o lo o i ai le magafa lea i Matautu, e agai la i tai i le sami agai i tai i Vaiala, i luma tonu lava o le falesa EFKS Vaipuna. O i ina lau Afioga, e toa lava le vai i taimi uma, tetele pe itiiti foi timuga, e toa lava le vai. O ananafi ma nei i le afiafi sa ou taamilo atu ai e le sao taavale e lua i le taimi e tasi. Lau Afioga pei ona silafia o lea ua tapuni le auala laupapa lea e i Vaisigano. E pau lava lea o le auala lea o le a faaaoga i le taimi lenei, o le auala lea e agai atu ai i le ofisa lea o Tiute i le uafu ma nisi foi o pisinisi o lo o i ai i tua i ina. E pau lava lea o le auala. O le auala foi lea o lea e faaaoga e loli ma masini tetele e ui mai ai ona o lea ua tapuni le vaega lea i Vaisigano i le auala laupapa.

O lea e tatalo atu ai lau Afioga i le Minisita pe mafai ona faaagaaga mai se seleni lea se i fai ai le vaega lea i le taimi lenei. O lo o faaletonu foi lau Afioga ua tele foi pot holes o lo o i ai i le taimi lea, e le o iloa atu, a ua i ai taavale i le Aso Gafua ua faapena ona faaletonu ai ona o le tetele o pot holes lea ua i ai. O lea e tatalo atu ai ma le agaga maualalo ona o talosaga ua leva ona faataatia atu, ua tausaga, ae pe mafai ona faaaoga mai se vaega o le seleni lea se i tau faatino ai se galuega e tali atu ai mo le auala lea. Mo le auala lea, na ou faalogologo o tau foi auala galue ma nisi o auala, a o le auala lea, a tuu i le isi itu, o lea ua faaaoga faa-main road, e le na o tagata o lo o nofoia lea vaega o lo o faaaogaina le auala lea, o lo o faapena ona faaaoga e le mamalu o le atunuu. O lea e tatalo atu ai ma le agaga maualalo i se fesoasoani mo lea vaega aemaise foi o le itu i sasae o le pa lea a tatou i le Apia Park, o nai aiga ua matua mafatia tele ona o lologa i lenei vaitau o timuga. A o faafofoga mai foi le Afioga i le Minisita mo Galuega ma Atinae Eeseese, e momoli atu foi le agaga faafetai ona o le Aso Gafua sa maua ai le avanoa o lou nei tagata ma te feiloai ai ma ma talanoa i tulaga ia. Ae ala ona ou talosaga i le GCF, a le maua mai i le GCF a o lea ua toe faafofoga mai foi le Afioga i le Minisita. Sa ou alu ese i le aso lea i le ma feiloaiga ma le Minisita fai ma tala faa-tama Vaimauga Nu.2 ma le Nu.3, ia ma avatu ai foi le talosaga.

O le saunoaga a le Afioga i le Minisita, ia sa ou alu ese i le aso lea, lagona lava le mafanafana ona o le faapea mai, o le lisi o le taatia mai ua tumu, a o lea o le a ave loa i le lisi fou lea ua fai o le faatino loa lea o le a amata ai loa i le galuega lea a le Vaimauga.

SUI FOFOGA FETALAI: Malie le sui usufono se i tulai mai la lou uso lea le Minisita.

Susuga Hon Papaliitele Niko Lee Hang: Lau Afioga i le Fofoga Fetalai, ou te le fia faalavelave i le saunoaga a si ou uso mai le Vaimauga, leaga o maua lea ua faatasi nei i le Vaimauga. O le galuega lea na ma talanoa i ai e sao ai le saunoaga a le Minisita Lagolago i le Aso Gafua na oo atu ai i lou ofisa ma talanoa i le auala lea i Vaipuna. O le auala lea ua leva ona faaletonu. O lea la ua taatia mai faatoa logo mai

nei au e le tamaitai pule o le LTA, o lea o le a upgrade le vaega o le auala lea i le polokalame lea a le GCF. Masalo o se taimi faamaonia mai e le Sui Palemia le tulaga lea aua pei o lana Matagaluega lea e auala mai ai le fesoasoani lea o le Climate Change Fund, ae o le faamatalaga lena o le auala lea e saunoa i ai le sui usufono mamalu, ma o le auala foi lea na talanoa mai ai i le Apia Park, se i o atu foi e vaavaai po o le a se tulaga e maua ai se fesoasoani ona e sao o le nofoaga lena e vaia e i ai le mea pei se swamp lena e i tua i ina i tua i le Apia Park. Ae ona o la e ua toatele foi le mamalu o le afioaga ua affio ma papaaao i lea vaega o le atunuu o lea o le a toe tagai i ai le Matagaluega po o le a se fesoasoani ona o galuega ia aemaise lava le taimi lenei o le louloua o le tau, e faaletonu lava nai afioaga ia.

Ia o se faamatalaga lena e fesoasoani i le mataupu lea e lagalaga mai e le Afioga i le Minisita Lagolago. Faafetai.

SUI FOFOGA FETALAI: Ia o lea ua tali le talosaga, o lena ua faafofoga foi lou itumalo ma lou afioaga. E lelei ona faamei i nisi mataupu o lea ua tapena le Malo aua lea faamoemoe.

Tofa LENATAI VICTOR FAAFOI TAMAPUA: O lea ua musumusumu mai si ou uso lea e i ou autafa, fai mai o le tali faafilemu. E leai, o le tali faa-Vaimauga ia o le tali mautinoa, ae malo faafetai i lau Afioga i le Minisita, faafetai foi i le tali mai i le talosaga e pei ona tuuina atu.

SUI FOFOGA FETALAI: Ave lou faamoemoe i le Minisita o le tama tau Vaimauga aua e te faalogo fua i le Aiga i le Tai. Saunoa ma faaauau le saunoaga.

Susuga Mulipola Leiataua Laki: Ou te tulai atu lau Afioga i le Fofoga Fetalai ona o lea ua taua le Aiga i le Tai, leai na ou fai atu i le uso a sui usufono, o la e ua tumu taatia mai ae o la e ua tuu oe ia taatia atu.

SUI FOFOGA FETALAI: Faaauau le saunoaga i se isi vaega.

Tofa LENATAI VICTOR FAAFOI TAMAPUA: Lau Afioga i le Fofoga Fetalai, ona ou oo mai lea i le Minisita o Pisinisi ma Alamanuia. Lau Afioga i le Fofoga Fetalai, o le tausaga ua tea, sa ma talano ma si ou tina. O si ou tina ua 85 ona tausaga. Sa faapea mai ua fia fai lava sona tamai faleoloa, e faaoga ai lona taimi. O le loomatua sa fai foi lona faleoloa i aso ia, i luga tonu o le aega lea i Magiagi. Ae ua faapea mai, pe mafai ona toe sau efai lona faleoloa i i. Sa ma talanoa, sa ou taumafai foi i ai e faamanino ia vaega, le eseesega ua i ai i le 20 tausaga talu ai ma le taimi nei. Sa ou fai i ai, e tele lava le suiga lea ua i ai. Ae o au, o le tala tuusao, ou te le lagolagoina, aisea? Ona e ese le vaitaimi

lena. O le vai taimi lenei ua i ai le competitive price. Ua pule lava le faleoloa i lana tau, ua le toe i ai le mea foi lea, o le price control board, e mafai ai ona o tutusa tau o oloa, i faleoloa retail uma i le taimi nei.

O le tali la a le loomatua, o lea ua osofia mai ai se manatu. Fai mai, oh o lona uiga o le vaega lea e fai a latou oloa wholesale, o lea ua fai le latou supermarket. Ua mafai ona aumai le tau o le oloa o le wholesale faatau i le tau i le supermarket. Ou fai atu, sao, sao lelei oe. E i ai le faleoloa a le tamaloa e fai lana wholesale lea o le a fai i Lelata. Afai la o lou faleoloa i Magiagi, e oti la le pisinisi.

O lea lau afioga i le Minisita, o le a se silasila a lau afioga ma le Matagaluega, i le tulaga lea i le price control. O le faamatalaga ia ua oo mai, o le tulaga...o e ua i ai tupe ua atili ona faaopoopo ma tele a latou tupe i le tulaga lea. Ua le gata i le fai o le latou wholesale i le taulaga toe fai ma supermarket i le taulaga. Ae ua tala atu i nuu i tua. Ua faaletonu ai foi taumafaiga a nisi o faleoloa laiti. O lea ua ou talitonu foi i ai, i le tala lea e faapea mai, se o Saina lea e oti ai. E leai e le o Saina lea e oti ai tatou, toe oti lava tatou ia tatou. Ae o se tuualalo i lau Afioga, pe le i oo i le taimi e mafai ai ona faapena ona toe tilotilo, e toe establish ia se vaega lea, latou te fua ai le tau o tatou oloa. E pei o se soso atu lea ma le agaga maualalo.

Lau Afioga o le aso ananafi sa faapea ona faaee mai e se tasi o sui i lou nei tagata i lana saunoaga, faapea mai. E i ai lou tofi faifeau, faafetai, e le teena ona o le mea e i ai Iesu ou te fia i ai foi ma au ia.

Ae o galuega e pei ona aumai ai le tuualalo, e talitonu o le a faapena ona tali atu ai le Afioga i le Minisita i se taimi i uta i le falepuipui i le tuualalo e pei ona e aumai.

Lau Afioga i le Fofoga Fetalai, e fia oo atu foi se faafetai i le itumalo. I le tapuaiga ma talosaga mo lou nei sui usufono. Aua foi le matua, le afio o le matua ia Tofaeono, afio Asi ma Patu, afio aiga e tolu, Usoalii alalatai Tamapua ma Manogiamanu ma le mamalu i le nofo ituaiga ia Fuata, tainane Ataga ma sa Ataga. Malo faafetai tatalo foi ma tapuai, ao taumafai foi lo tatou sui, aua se sao mo upu fai a lo tatou Malo. Lau Afioga i le Fofoga Fetalai, aemaise foi sui mamalu uma. Ia agalelei le Alii maua le malosi, i lenei tausaga, ua tatou talanoa i tausaga o le election year. O le tausaga o le palota, ia agalelei le Alii, maua pea le malosi, aua ne i mai se isi pe faavaivai. Ia faamanuia mai le Atua, i taulumaga o totoe o le tatou Fonotaga, aemaise foi la tatou folauga o lenei tausaga. Ma le faaaloalo lava faafetai.

FOFOGA FETALAI: Malo faafetai. Malo lauga, se o lauga e sue ai. Tulai mai le sui usufono mo Faasaleleaga Nu. 3.

Afioga TOFA FOLENI LIO TAMA GALU(Faasaleleaga Nu.3): Lau afioga i le Fofoga Fetalai, faapea foi le paia i le Maota. Tulai atu ma le agaga faaaloalo e fia fai foi se sao o lenei itumalo aua le Tala Faatatau o le Tupe. Ae muamua lava ona faafetaia le Atua ua o tatou i

ai i le manuia i lenei afiafi. E tiga lava timuga ma matagi, ae agalelei lava le Atua i le tatou Palemene ma Samoa. O le mea lea, e moni lava o Samoa o le atunuu e faavae i le Atua le Tama, le Atua le Alo, le Atua le Agaga Paia. Lou agaga ia e faamanu atu ia i le Alii, lou agaga e, aua nei galo se mea e tasi o ana meaalofa. O le agaga lena, faafetai i le Atua, o lo o manuia le tapuaiga a Samoa aemaise o tatou nuu a itumalo ma aiga, e ese le agalelei o le Atua o lo o faavae ai si o tatou atunuu.

Lau Afioga i le Fofoga Fetalai, malo faafetai, faafeiloai atu foi i lau Afioga ma le mamalu o le Ofisa o le Fono. E ofo alofa atu foi i Taitai o le Malo le Palemia, faapea foi le sui Palemia ma le mamalu o le Kapeneta, ae tainane sui mamalu o le Palemene. Malo le soifua malo le lagi e mama, o lea ua tatou i ai i le amataga o a tatou galuega o lenei tausaga. Faafetai i le Atua o lo o maualuga pea le aoina o le masina i le soifua o le Taitai o le Malo, aemaise le Palemene. E ofo alofa atu foi i Ofisa Sili o Pulega o Matagaluega aemaise lava le galuega o feagai ma i latou, auaunaga eseese, malo faafetai. Faafetai i le tapuaiga a Samoa, e le toe oo i ai se leo o lea ua tele sui usufono ua saunoa, leaga o Samoa lava o lo o tapuaia o tatou faiva. O le mea lea o le agaga faafetai lea, o le agaga fiafia i lenei afiafi aua le Fonotaga a le tatou Palemene.

E pei o lou tulai atu, na o le agaga o le faafetai. Faafetai i le afioga i le Palemia o lo tatou Malo, le Kapeneta faapea foi le Palemene. I le tele o lenei lima tausaga, o lea lava ua tatou oo mai i le tausaga faaiu o le tatou nofoaiga, malo faafetai. O le agaga faafetai lea i le Atua, faafetai i le tamaoiga ma le malosi, faafetai i le mafaufau ma le tofa mamao, aua Samoa ma ona atinae. O le mea lea, e momoli atu la matou faafetai tele, i galuega ua vaaia ma molimauina, ia faafetai. Leaga o le Atua e fesoasoani ia i latou o e saili. O le mea lea, malo faafetai. Faafetai i le Taitai o le Malo ma le Kapeneta ma le tatou Palemene, aemaise o Matagaluega e fia, o lo o vae ma lima i le tautuaina o le Malo. E tele galuega lelei, tele foi galuega taugata, e le tau fai atu se leo. E le gata i Upolu a o le motu i Savaii. O lea lava sa tatala foi auala i lena vaiaso, o le molimau lea. O le molimau lea a tagatanuu. E taua lava galuega, e le o upu ao galuega. O le mea lea faamalo i lo tatou Malo.

Faafetai i le Minisita o Galuega, lau Afioga Unasa Papalii, malo lava faafetai mo galuega uma. O le toatele lava o matou, e pei o auala lava ma taligalu. Ae faafetai i galuega sa faatino i Savaii. Ou te iloa o lea e faaauau pea galuega. Faafetai mo galuega sa faatino i si ou itumalo, mai lava i Saipipi, Saasaai ma Faga. O la lava ua nofo silafia e le itumalo, ia galuega ua faia. Ae toe faaopoopo atu, e manaomia lava....o le matou itumalo e afaina tele i le sami, o mea ia o taligalu, afioaga ia o Faga, Saasaai ma Saipipi. O le Laulelei o Amoa, e laulelei i le oneone, ae afaina tele i galu ma vai. O le mea lea, e pei o nai talosaga na, o taligalu ma matou auala galue. O le tele o le itumalo ua agai i uta ona o le tulaga i le siitia o le suasami. E pei lava ona saunoa le Maota i le suiga o le tau. O lea lava e tuputupu i luga le suasami ma afaina ai ia fanua. O le isi vaega o le mea lea o auala galue, faafetai mo auala galue

ua faatino. O Saipipi, Saasaai ma Faga. Ae toe talosaga atu auala galue i Saasaai, o le auala lea i Faga, ona o le afioaga lea o Faga e tele, tele le nuu. E le tau fai atu, Unasa se i silasila ane i lo ta nuu. E manaomia lava le auala i uta, auala galue, faaopopo la i ai ma ni moli, leaga ua fai si pogisa. E pau lava na o mea e lua, o nai moli auala i auala galue ona o le tele o le nuu ua agai i uta e galulue.

O le vaega lea i le falemai i Tuasivi. O lea foi ua afio mai..... o lea matou te galulue ai i le Matagaluega o le Soifua Maloloina. Ae lelei pea ona avatu se lagona. Tuasivi, o lea lava pei e centre i ai Savaii, ae moomia lava le faaleleia o ona fale, aemaise o le falemaliiu. E tasi lea mea taua, ua faafetai i le falemaliiu lea o Pau Sefo lea ua tuumalo, atonu e pau lava ia o falemaliiu. Ae faafetai i le Afioga ia Pau o lea ua tuumalo, ae ese le aoga ma le taua o falemaliiu mo matou i Savaii. Ae talosaga atu, se i toe faaleleia le falemaliiu i Tuasivi, ma nisi foi fale, ua toatele foi le aufaigaluega, aemaise lava se fale lelei e fai ai fonu, ia i ai se hall i ina. Ou te iloa ua fuafua foi le siitia mai i Salelologa, ae mo lenei taimi.

Avea foi lenei avanoa e momoli atua i le faafetai i le Malo aemaise le Afioga i le Palemia, i le vaitaimi foi o le faamai o le misela, faafetai i lo tatou Malo, tulaga foi e pei ona i ai lea faafitauli, ae alofagia pea Samoa e le Atua. E le mafai ona tuulafoai, e ui lava ua malilii ai nai fanau ma nisi, ao le Atua lava e pule silisili i le soifua ma lo tatou ola. Ae faafetai i galuega sa feagai ma le atunuu, faapea foi le lagolagosua o afioga. I totonu o le tatou atunuu, ia faafetai o lea lava sa galulue ma fesoasoani, aua lenei faamai, e le toe fai atu, o lea ua saunoa uma i ai le Maota. E momoli le agaga faafetai i le lagolago a Matagaluega e fia, aemaise lava tulaga faapenei. E pau lava le mea, tatou matala pea, nei foi matagi ua agiagi mai ma aafia ai, atonu e i ai foi le aoga o matagi, ou te iloa o matagi nei e tafiese faamai ma timuga. Atonu o le ala lea, ae tatou tuu pea i le Atua aua tulaga e pei ona i ai Samoa ma faafitauli. Ae faafetai tele i lo tatou Malo, o lea foi sa afio atu le Palemia i Savaii matou feoi ma asiasi, o lea lava ua molimau galuega. O le mea lea, faamalo i le tatou Palemene aemaise foi o Matagaluega e fia. Faafetai foi i lau Afioga i le Minisita o Tupe faapea le Ofisa Sili o Pulega ma le Matagaluega. Faafetai i la outou galuega e le faigofie aemaise foi le lufilufiina o seleni, malo le faasoa, aua otupe lava ma le tamaoiga lea e faamoemoe i ai, ae faafetai o lo o faamuamua pea le soifua maloloina ma aoaoga, ou te iloa o mea taua ia mo le atunuu ia soifua manuia ma aoaoina fanau ma le atunuu ona maua lea o se Samoa saogalemu ma se Samoa e aoaoina ona tagata. Faafetai i le nofo a Minisita aua galuega fai aua le atunuu.

E avea foi lenei avanoa e momoli atu ai le faamalo i si ou itumalo i le paia i le Taulagi ma le Maopu faapea foi le tapuaiga i le Falefitu ma tatau tainane le pule ia Segi, le pule i le uu ma le matua fetalai ia Segi faapea foi le falefa ma le Faleaana ma le mamalu ia Salemuliaga. Faamalo tapuai i lo tatou itumalo. E leai lava se mea o faaletonu, o lo o

manuia foi le tatou sui e pei lava ona i ai ae faafetai tatalo, faafetai foi i le aufailotu ma le au ositaulaga aua le nonomanu aua le tatou itumalo aemaise o Samoa.

Ou te iloa na o le pau lea o se lauga a lenei itumalo, na o le agaga o le faafetai ma le faamalo i le tatou Malo ma Matagaluega e fia, ia alofagia e le Atua fuafuaga uma o le alo atu i ai i lenei tausaga ma le amataga, ia faatasi ma taitai e le Atua la tatou folauga. Manuia le tapuaiga a Samoa. Ma lou faaaloalo. Faafetai.

SUI FOFOGA FETALAI: Malo saunoa i lau Susuga i le Aoao Fesoasoani. O lea ua faafofoga le Maota ma le atunuu, o ou mama na. Ia ua avanoa foi le Maota mo se isi sui usufono e fia saunoa.

Ia tulai mai Gagaemauga Nu.2 lea ua Nu.1 i le taimi lenei, le tama matua o le Maota.

Tofa Hon FAASOOTAULOA PATI TAULAPAPA (Gagaemauga Nu.2): Ia o lea ou te Nu.2 lava. Faafetai i lau Afioga i le Fofoga Fetalai. Ia sa nofonofo lava lenei sui usufono ma mafaufau po o le a se mea e tatau ona... Ona ou manatu lea, e tatau ona ou nofo e momoli atu se faafetai a si ou itumalo. E faafetai atu ai i lau Afioga i le Fofoga Fetalai. Faafetai le Afioga i le Palemia ma le Sui Palemia ma le Aiga Kapeneta. Faafetai tele lava mo galuega lelei. O Samoa ua uma ona taoto a o se alao. O outou sa ma paia e masani ai, ou te talitonu lava e te tupu lava oe i lou aiga. Ae faafetai i le Atua ua tatou maua lenei laolao e tatou te faasoia ai i mea lelei. Sa ou manatu ou te le... leaga ua fai foi si fesuaiga o le olaga ua matua foi i te i ua sasi se upu ona faapea lea ai ua le faaaloalo le toeaina. Ae faamalulu atu pe afai foi o le a se matau ma se aga ua le tau tamalii i la outou silasila. E tatalo lava i le Atua. O lenei sui usufono na pau le mea e faafetai ai o le faafetai i le Atua ona o le faamai sa feagai ma tatou. Sa ou manatu lava au o le iuga lea o le lalolagi ua i ai aua ua amata atu i tamaiti. Ae faafetai ua o tatou talitonu o Samoa o le atunuu lotu sa tatou punonou ma tatalo, alu le tagata ia i lona pausisi ina ia aua ne i oo mai mala ia e le manaomia i o tatou talitonuga faakerisiano. A o le agaga ua ou tulai ai, faafetai tele lava Tuilaepa i lau faigamalo, le Aiga Kapeneta. E le tagisa lenei itumalo, e ui lava ina i ai nai mea laiti pei ua faanoanoa ai ona ua aveese nisi vaega o lou itumalo, ae leai se mea tatou te popole ai, e le po pea se nuu, e i ai lava se taimi toe tefa le tauala i le tou Aiga Kapeneta ma i ai se fesuaiga, ae tatou tatalo pea i le Atua leaga o Samoa o le atunuu tofi, o le atunuu ua uma ona faataoto ma faataatia e o outou tuua ma o tatou matua. Faafetai i lenei fesuaiga ua i ai. Pau lava le mea ia tatou tatalo i le Atua ina ia mafai ona tatou galulue faatasi, tatou galulue e le o le itumalo e le o le nuu a o tagata atoa o Samoa ina ia maua lo tatou agaga tatou te faasoia ai ina ia tofufusia le itumalo ma mea lelei.

O lou itumalo, po o fea lava e agai i ai o le mea lava e tasi, o le lelei ia o lou itumalo. O lea foi ua faafofoga mai lou itumalo o lea ua avea au ma sui e momoli atu ai le faafetai i lau Afioga i le Palemia ma le Aiga Kapeneta ona o mea lelei ua faia i lou itumalo. E le vaivai lenei itumalo, po o le a lava, ae talitonu ua tele mea lelei ua tulai mai ina ua tulai mai o le tatou faigamalo. E tasi lava si mea laitiiti lea na o le fia momoli atu i le Afioga i le Minisita. E i ai lava si mea laitiiti lava i le nuu la e i tai o le matou nuu na ou alu atu ai foi i lau Afioga e fia maua se fesoasoani i le mea la ua fia momotu le mea la e sa sau ai le alavai mai le moana i tai i le aloalo, ua toa ai le pala, ua le toe sau le sami i uta. O le mea lena o lo o tatalo atu ai pea ma tuuina atu pea i lau Afioga pe tefa le tauala i nisi o le Matagaluega se i o se i vaai pe ono fai i ai se togafiti po o se mea, ua le toe lelei tua i gauta i le aloalo o le matou nuu ua punitia le alasami lena e sau i tai i le vai. Na pau lava lena o le mea. Faafetai atu mo le matou auala, faafetai atu i le Malo. E momoli atu le agaga faafetai, ou te talitonu lava o lo o faia mea lelei mo le lelei o le atunuu. E tatalo atu foi, o lo o faalogologo mai le atunuu. E masalo e ia te au foi le agaga e faailoa atu ai lou itumalo, e le faia ni faatosina i nei mea... ae ou te tatalo lava i lou itumalo, ou te toe fia sau foi i le isi lima tausaga. O lo o maua lava lou malosi e fai ai nisi atinae, ou te talitonu lava o lo o i ai pea lo outou agaga i le toeaina, e le faia se tatou palota, tatou o faatamalii ona fai, aumai lo outou faatuatuaga i le toeaina, e faigofie, e alolofa mai ai foi le Kapeneta ma alofa mai Tuilaepa e toe fai nisi mea lelei. A o mea uma lava, o lau tatalo lea i lau Afioga i le Palemia ma le Kapeneta, ina ia faapena ona nai mea na o lo o moomia e le matou itumalo i le gataifale faapea foi ma nai ou taligalu. Ua amata foi ona oia taligalu ua siisii foi le tai e pei ona tatou vaai i ai.

E pei na o le pau na o nai mea e fia faaali atu o lou itumalo, a o le agaga faafetai o lena ua silafia e leAtua mea uma, matou te tatalo ina ia faapena ona i ai pea le manuia o le Atua i lau Afioga i le Palemia ma le Kapeneta ina ia tatou toe omai uma i le palota lea o le a fai. Ma lou faaaloalo.

SUI FOFOGA FETALAI: Malo faafetai. Ia o le tofa faa-toeaina e malu lona momoli mai o le talosaga. Ia agalelei le Atua i le faamoemoe pei ona saunoa i ai oe le toeaina.

Ia tulai mai le sui usufono mamalu mo Sagaga le Usoga.

Susuga SEIULI UELIGITONE SEIULI (Sagaga le Usoga): Faafetai mo le avanoa i lau Afioga i le Fofoga Fetalai. E faamalulu atu se i fai lou peleue, o le peleue lea na pau mai anapo lea na saunoa i ai le Afioga i le Tuisamau. Se i soua ia le fala o Tumua, o lea o le a ou saunoa faa-toeaina pei ona saunoa i ai Saleaula. Faafetai o lea ua ee le matagi, ua faaee foi foe o le savili i lenei itula o le afiafi. Ia se i ou faatalofa foi au o sui usufono uma lava sa sausaunoa foi sa faatalofa i lau Afioga i le Fofoga Fetalai. E faapea foi ona ou faatalofa atu i le

Afioga i le Palemia, Sui Palemia, le Kapeneta ma sui a Minisita faapea foi le paia ma le mamalu o lena itu o le Maota, Afioga i Taitaifono ma Sui Taitaifono ia faapea foi le mamalu o le Palemene o Samoa aemaise foi le afifio o le paia ma le mamalu o Ofisa Sili o Pulega ma Faalapotopotoga a le Malo ua tatou faatasi i lenei afiafi e faapea foi le afaasalalau i TV ma nusipepa, malo le soifua ma le lagi e mama i lenei itula o le afiafi, le itula faatimutimu ma le lagilagia o le tau.

E faatalofa atu foi i lenei Maota, o le maota pogisa, o le Maota fai mai e tulutulitao ae ato i mamalu, le tofa faatupu, le tofa faatamalii, e tausi ai le mamalu o Samoa. Samoa, o oe o le atunuu tofi, e le o se atunuu taliola. Pe oo i ai sau faamatalaga pe leai, e leai se poto po o se vave na te suia le paia ma le mamalu o Samoa. Ae na ona ou faapea atu, ia nuunuu atu ia faatini o tausala outou paia ma mamalu, aemaise le afaigaluega a le Atua o lo o tauasuina le ipuvai o le ola aua se manuia o Samoa mo nei ma a taeao. Sa leai se manatu e fai sau lauga, aua e le faatoa fai ai lea o sata lauga, na sau muamua foi fai le lauga faataupou, oo foi i le taimi o le a taumavae ai ia lea paeaiga ma lea paeaiga sa fai foi lauga e faamavae atu foi. Ne i te i ua faapea lou itumalo o le taufaasee pe ou te olegia latou. Ae se i ou alu muamua lava i le Tala Faatatau o le Tupe ua mafua ai ia lenei Fonotaga.

Lau afioga i le Fofoga Fetalai ona ou oo mai lea i le Tala Faatatau o le Tupe ua i luma nei o le Laulauafono. Faafetai i le Minisita o Tupe, faamalo i le Ofisa Sili ma le Matagaluega o Tupe, faafetai mo le faasoasoa mo le mea e moomia ai le seleni, aua le ola fiafia ma le ola manuia o tagata o Samoa. Aua e fai foi o le silasila i le lauamanu, ae ao foi ona mataitu le faamulioatu. Faafetai mo le Tala o le Tupe e pei ona tuuina mai, e matua lagolagoina lava e le sui usufono o lenei itumalo ia le Tala o le Tupe.

O le tele o manatu sa manaomia lava mo mea ia o auala galue. E pei foi ona saunoa atu ia lau Minisita oi le afioga i le Palemia, e 50 sui usufono, o nuu i totonu o lea itumalo pe 6, 7. Ua tele naua ia sui usufono o lo o moomia ia auala galue. Ae ou te faafetai i le Malo ona o le auala lea ua fai atu i le taimi lenei e alu atu i Toamua se i tau atu i Malua. Ave i ai le faamuamua a le Malo. O lea foi ua maua le tala e le gata ai i o ae o lea o le a toe alu atu ai i luga le isi ta o le asphalt e toe faalelei ai e pei o le ta lea e sau mai i Vaitele e sau mai i le taulaga, ua matua manaia lava.

E maua foi le faamatalaga o le a faaauau atu i Malua e tau atu i Faleolo, e tau atu i le uafu i Mulifanua, o galuega lelei ia, aua le manuia o tagata lautele o le tatou atunuu o Samoa.

O lea foi o lo o i ai le faamoemoe o le Malo, mo le faapaiaina o lenei tausaga i totonu o le auala laupapa tele lea e i i i Vaisigano, ia faapea foi ia le auala sima tele i o i Maliolio, galuega tetele ia ma le taua aua le manuia o tagata Samoa. Faafetai tele i le Malo mo a latou galuega. Faafetai i le Kapeneta mo le mataituina o nei galuega tetele a le Malo

faaauau pea ao feagai ai ia Samoa i lenei vaitau o le soifuaga, i le faigata o tupe maua i lo tatou atunuu.

A faapea ou te manao i se auala galue, masalo a faapea foi ou te manao i se eletise, pe ou te manao foi i se vai, faafofoga mai la ia le Palemene, masalo a faapea lava ou te fai atu i lau Minisita faamolemole e fai sou auala galue. E pei ou te faavalevaleyalea ea, o lea o au ma lau Minisita lea e i lalo le vaaiga o auala galue, o mea tau vai, o mea tau moli ae o lea la ou tauanau atu i lau Minisita ia fai le mea lea mo au. O le mea lea, o lou itumalo e le tagisa, e onosai pea ma onosai pea, e i ai lava le taimi. E i ai le taimi tatou faatali foi i le taimi lea e faapea i le taaloga lea faagatama lea o le kirikiti, e faamoemoe i le masaga lea e tulia le ai. E faamoemoe o le masaga lea o tagata mulimuli ia o la e tata. Ae o le taaloga lea o le faagatama lea o le kirikiti, o lea foi la ou te faamoemoe se i uma ona fai ia outou auala galue ma mea tou te finagalo ai, ona fai mulimuli lea o se auala o le itumalo.

Ia ae o se faafetai puupuu lea e tusa ai ma le faaauau o lenei tausaga. Ae se i ou afe atu pea i lou itumalo ne i te i faapea ia le itumalo ou te le avatua se faamalo i le latou tapuaiga.

Ia le paia o lou itumalo o Sagaga le Usoga, lea ua le toe taua nei ia Sagaga le Usoga o lea ua taua nei o Sagaga 2 lea ua i ai ia lou itumalo ua le toe Sagaga le Usoga. Faafogafoga mai lou itumalo ia Tuanai, le afifio o Saena ma le aiga Sa Saena, Susu Luafatasaga o le alo o Fuatino, Afifio Tuitea tofia Papa, Fale ma le Afu o Lealataua, ae faapea foi lou nuu o Afega, le Afio o le Aiga Sa Gaufaleai, lo oulua toalua Fata ma Maulolo, tuitui o le gataitele, vagana i tulafale ma upu ia te oe Tuisamau, ia ae faapea foi i si ou nuu o Malie, Susu o le Tapaaufaasisina le Susuga ia Malietoa, Susu i lona nofoa vaevalolola, ma lona fala folalola, ma lona tala na atoa, a malele ua faafogafoga i ai Samoa, Afifio Maualaivao ma le matua ia Faamausili, Susu Seiuli o le ulu na taulata e toafitu ma matagi, Susu Taito ma le Aiga Sa Maualaivao, le mamalu tele o pou e fitu o le maota o Malietoa, ma lau fetalaiiga Auimatagi, le alo o Laulii ma Salepo, le upega fetalaiiga i le lautu na laulelei.

O paia ia o lou itumalo o lea ou te tiu ai nei i le Maota nei o le faautugatagi a Samoa. Malo le tapuai faafetai foi le lototetele. Ia ua manuia lo outou sui usufono o le itumalo, ia manuia tele le Fonotaga a le tatou Palemene, fonotaga muamua o lenei tausaga, e toe maua foi se isi leo pe a faaiu le fonotaga mulimuli o le Palemene, faafetai ma ia manuia ia le tatou fonotaga.

SUI FOFOGA FETALAI: Malo saunoa i le sui usufono mamalu. O la ua faafogafoga mai lou itumalo, o lea ua e faamalo ma faafetai i le latou tapuaiga, malo faafetai.

Ia tulai mai le sui usufono mamalu o Palauli i Sasae, lou avanoa lenei.

Afioga TUIFAASISINA MISA LISATI LELEISIUAO PALEMENE (Palauli Sasae): Ia, lau afioga i le Fofoga Fetalai, tulai atu e fai se sao o Palauli Nu.3, aua le Tala o le Tupe ua lauliliuina i le Laulauafono i lenei aso. O sa ma faiga o lenei Maota, tainane Samoa faafogafoga mai, e i ai le manatu o lea ua maea ona sama le lama, i saunoaga ua maea a sui usufono, i lenei aso.

O le taofi o le sui usufono o Palauli Nu.3, e lagolagoina ia le Tala o le Tupe. Ae e i ai ia nai talosaga e faamauina, pe sa tuuina atu foi i Matagaluega taitasi, aua lava le taumafaiga o lenei paeaiga. O lea e toe tatalo atu ai i le Minisita o le MNRE, aemaise taligalu, se i silasila ifo i taligalu o si ou nuu lea o Faaala, ua leva ona asoa foi le talosaga na tuuina atu, ua afatia tele e le galu, aemaise ia tatou atinae foi ia o le turisi.

E molimauina lava ia le mataaga lea i Aganoa, tasi lea o mataaga e lagolagosua i le atinae lea o le turisi, e aumai ai i totonu ia le tupe maua. E i ai ia le tatou foreign exchange lea o lo o i ai nei. Ma e pau ai foi lea o le mataaga i Samoa atoa, e ese foi lona ia ituaiga, Ma e i ai le talitonuga, o lo o faamauina i tupe maua aemaise foi ia tagata tafafao mai fafo. Ia ma sa i ai foi i totonu o tatou taaloga a le Pasefika i le tausaga ua tea. O lea e talosagaina ai lava, e taua foi nei atinae e lagolagosua i tatou atinae ma tatou tupe maua e atinae ai le tatou Malo.

Ona oo mai lea i mea lava ia o auala galue, le Minisita o Galuega, leai o le toe tuitui atu lava e faamanatu ia le tatou auala galue lea e i si nuu lea o Vailoa, ia ma le nuu lea o Faala foi. E pei lava ia se faamanatu po o se tuualalo a lenei sui usufono, aemaise foi ia Palauli Nu.3, e tele ia o le sao o lenei itumalo. O le itumalo lenei o lo o i ai le vai, o le vai lea, masalo o le afa o le Maota lenei, e feinu uma ai e oo i le Minisita o Tupe, e oo i o i le falemai, e oo foi i le tatou maketi lea e i i Salelologa, o i o lo o sau mai i ai ia le vai lea e i Palauli. Ia ao lenei lava e tuitui atu. O isi auala ia e talosagaina, ailoga o i ai se mea a le Malo o maua ai? Ae e pei o auunaga nei, e fesootai lelei ma matimati ai ia le tatou atinae.

Ona oo mai lea i le tatou auunaga lea o Turisi. O lenei foi itumalo o lo o i ai foi lea atinae i totonu. Ma e o le masina foi ia Fepuari, e tatala ai foi ia le isi mataaga e ese le ituaiga. Saunoa le Palemia i ituaiga atinae eseese, i totonu o le Turisi. O le atinae lea e tatalaina i le Aso 14 i Palauli, ia e na o le pau le mea e fai i le atinae lea, e na o maa. E na o maa o le fetumaa. O mea sa nonofo ai ia tatou... o le talaaga lea o Samoa, o tatou. Ia e na o le faamama lava o maa, ae o le mea e pito i sili ona taua, aemaise lau afioga i le Minisita, o le tala, o le faamatalaga o le tala. O lona uiga o le story lava o le mea taua kiligi le mataaga ae fai le story.

O isi mea uma lava ia e tele tau e alu ai, ae o le mataaga lea e na o le kiligi lava o le maa, alu atu le tagata fai le story. O le story lava e tatau ona lelei. Ia e maua ai foi galuega, maua ai galuega a le autalavou foi, ia toaina foi. Ia o le tulaga lea, e tatalo atu lava, se e i ai ia tatou

taavale foi ia lea sa aumai i le taaloga a le Pasefika, pe le maua se van lena e ave i ai.

Ae faafetai lava i le tatou Iunivesite, o latou lea sa lagolagosua aemaise le Minisita o Aoga, i totonu foi o le taumafaiga o lenei atinae. Aua o le atinae muamua lenei e ese lona ituaiga, masalo e tele foi nisi afioaga po o alalafaga, o le a o mai i tua ma tele e maua i nei ituaiga atinae.

O se tuualalo e tuu atu i le tatou Matagaluega lea o tu taulaga, e tau lavea ai le mea lea o le traffic. O tatou uma lava tatou te aafia i le traffic lea tatou te lavevea ai i le taeao i Vaimoso amata atu i Lepea sau i Taufusi i le taeao ma le afiafi. Pau lava se tuualalo a Palauli Nu.3, e le toe i ai ni auala e tatau ona toe faia. E talitonu lava le agaga, o le mea e tatau ona fai, o le fai o tatou tamai mini bus stop, fai le bus stop i Vaitele pei se mea e o i ai pasi, fai le isi bus stop i le NUS po o Vaivase. Aua o le tele o tagata e o ai mai i Vaitele, e o i tai i i toe o i Vaivaase. O le mea la e fai, alu atu sao lava le pasi iinei alu i Vaivase, o ai tamaiti o le kolisi, o ai tamaiti o le NUS, o ai tamaiti o le Vaivase Primary School, aua o i ina lea e taulai i ai, a o le tele o tagata o i i Vaitele o atu ai. O i i Vaitele e o atu ai. A o le mea lea e tulai mai i le taimi lenei, e o uma i Savalalo i Apia, ae tele foi isi faafitauli e omai ai. Aua o i ina e o atu ai tamaiti misa ai, o atu ai ma leoleo, alu ai le latou taimi. O taeao lea e tutu leoleo i moli ia e fai, alu ai le taimi, a o lea e i ai moli, o lea e i ai tatou moli e faaoga. A alu la tatou pasi ia i o, Motootua le isi vaega e alu i ai, alu atu i i, aua o i ina e o i ai isi tagata. E alu atu alu i Motootua, alu i Vaivase alu i le NUS, ae sau le pasi mai tua tu i Vailele i le itumalo o Tuisamau fai le isi bus stop i ina, omai tuu i ina, omai i le NUS, ma omai i Vaitele. Sau sao lava pasi na, Vaitele, Vaivase, Vailele. Vailele, Vaivase sau i i, aua le sau i tai i i, o i lea e tupu ai le faafitauli, o i foi lea e o i ai leoleo, o i foi lea e maumau ai le taimi ma tele ai le vevesi ma tele ai taavale fetoi solo ma tele ai ma isi faafitauli. Tatou social issues ia i totonu i i le taulaga. O lea e tuualalo ai i le Afioga i le Palemia o ia o lo o i ai le traffic, aemaise le mamalu ma faaoga foi i ai le maketi lea sa fai e lou uso o Faumui i i i Vaitele. Faaoga i ai le mea lena ma tuu i ai, pe tasi lava lena mea lelei a Faumui na fai. O lea la e fai atu ai nei, fai mea na, aua o lea e mafaufau le tatou Malo fai le mea i Sogi. E leai, faaoga muamua le mea lea ua i ai, o lea e i ai le mea i Fugalei, e le o faaogaina le mea lena i Fugalei, e seasea o i ai. Ae vaai, alu atu sao lava le pasi alu le tagata i Motootua aua e fia o uma tagata i Motootua, e o e vaai le fomai, ma o e tui le misela, toe o alu i Vaivase e o atu ai tamaiti i Malifa ma o i o i le kolisi, o ifo i Malufou. Ma le isi la mea...

SUI FOFOGA FETALAI: Se i malie le sui usufono se i tau fai sina koma laititi. Malo mo le finagalo faaalua.

Tofa Lealailepule Rimoni Aiafi: Lau Afioga i le Fofoga Fetalai, pei a saasaa le sui usufono mamalu. Faafetai lava i lau Afioga i le sui usufono mamalu. O lena e te tagai mai lau Afioga o lea e lauga ma faasagasaga mai ia te au le sui usufono mamalu ona e pei o au le sui o Vaitele, o le a to atu ai lona finagalo. Ia taatia mai lou finagalo lau Afioga i le sui usufono mamalu, faafetai ua avea lava oe ma Pule Sili o Vaitele, o le a faasuafa foi oe ia Tuivaitele. Faafetai.

SUI FOFOGA FETALAI: Faafetai. Ia se i faaauau le saunoaga.

Afioga TUIFAASISINA MISA LISATI LELEISUAO PALEMENE: Faafetai. Pei uaalaonaoutaua Vaitele, o i lea e teleaile faafitauliauaateleaitatoutupe e maua, aua a na faapea e tuu lava Vaitele ia e nonofo ai le au Savaii ia i le mea e i ai, e leai lava se mea e tupu, foi lele e leai se mea e tupu i totonu i i. O le mea la lea, omai tagata mai Falefa omai i i, nonofo i Vailele, omai lava lea omai i tua i Vailele. Aua o le tele o tagata ia...

SUI FOFOGA FETALAI: Malie le sui usufono mo Palauli se i tulai mai le sui usufono mo Vaimauga.

Afioga Sulamanaia Fetaiai Tauilili Tuivasa: Lau Afioga i le Fofoga Fetalai, e leai se agaga e faauilavea leaga o le uso moni lava. Na pau lava le mea leaga o Savaii lea e aumau ai, a o se fesoasoani i le sui usufono, leaga o le uso o au lea e aumau i Savaii. O lea e taua le maketi a le Afioga ia Faumui, faamolemole o la e ua i ai le Coin Save. E pei o le mea lena e fia faamanatu i si ou uso, ae leai e manaia lou finagalo ia Vailele ona o la e i ai ta fanua la e avanoa ia e lelei e te lagolago mai. Ae pei o le mea lena e faamanatu Vaitele lea e i ai le maketi, ua le toe i ai se maketi o la e ua lisi ai le Coin Save. Ma lou faaloalo lava.

SUI FOFOGA FETALAI: Faafetai. Tulai mai le sui usufono mamalu e faaauau.

Afioga TUIFAASISINA MISA LISATI LELEISUAO PALEMENE: Faafetai, e pei o le isi lena mea e tuumamaina ai, o le tulaga e i ai, o le feoaiga o tagata. O le mea lena e tataua ona fai, ae le tele ai se tupe alu, ae pau o le mea e i ai, o le tatou taumafai e sui le feoaiga o pasi, aua a omai tagata, o le tele o tagata ia e faigaluega iinei i Vaitele, e omai mai tua i Falefa ma Lauili ma i ina i Vailele. O ifo loa i Vailele omai ai loa i le pasi iinei, tuu tamaiti i Vaivase, tuu tamaiti i le NUS, omai ii tuu tagata i Motoootua, sau ai loa iinei i Vaitele. O le tulaga lena e avatu ai se tuualalo a Palauli Sasae, e toe faavasegaina ma toe iloiloaina o tatou feoaiga e faamama ai le traffic lea tatou te feoi ai pea i aso uma aso uma, aua leaga e i ai lava le impact i luga o tatou

galuega taitasi, ma e talosagaina ai le Malo e silasila ifo i nei fautuaga ua avatu.

Ona muliai lea o se faamatalaga, e fia fai lava se faafetai i le Minisita mo le Soifua Maloloina aemaise foi le aafiaga foi sa i ai. E talitonu lava, o le falemai lea o Satupaitea ma Palauli, tasi lea falemai sa tulai mai i le taimi foi o le faamai, ma sa molimauina lava foi le lagolagosua mai a le tamaitai Minisita ma le vasega o fomai i le taumafaiga o lenei falemai, e lagolagosua i le taimi sa tulai mai ai foi le faafitauli, ma sa tele a le sao sa fai i totonu o si o matou itumalo, ma e leai lava nisi na aafia foi i le tulaga o i ai. Ia e pei o nai tamai mataupu ia ua oo atu i lau Afioga, ae si ou itumalo aemaise le paia ia Faasisina ma Sa Lilomaiava, le levaleva ia Sa Faleletaua ma upu ia oe Palauli o oe o le Pule faapea foi Samoa na potopoto. Manuia le Fonousu a Samoa.

SUI FOFOGA FETALAI: Malo faafetai mo fautuaga, o lea ua faafofoga le Kapeneta, taoto laia o lou finagalo se i fai i ai le latou fuafuaga mo le lumanai.

Ia ma o le avanoa lelei lenei mo se isi sui usufono. Ia saunoa le sui usufono mo Falelatai ma Samatau.

Afioga TAEFU LEMI (Falelatai ma Samatau): Faafetai i lau Afioga i le Fofoga Fetalai. O le igoa o le toga e fai i le itulagi lea matou te omai ai o le sii ma tuu. Ma pei sa tau faapena se faamoemoe, na o sina Tala Faaopopo o le Tupe itiiti lava. Sa fesiligia au e le Failautusi o le Fono pe fai se tala, ia ona ou faia tu lea, a faapea e saunoa uma lava le saofaiga a Minisita lagolago, ona ou fia faaaogaina lea o le avanoa e faamanuia ai le tausaga fou i lou itumalo.

Lau Afioga i le Fofoga Fetalai, masalo o le ogatotonu o le tausaga pe a o le a toai mai ai i lumamea nei le Tala Autu o le Tupe, ma o le Tala Autu mulimuli lena o le Tupe a le tatou Paeaiga, ma o le Tala foi lena o le Tupe na te momoli atua le tatou Palemene nei i lena tausaga ma le faaiuga o le tausaga ma faalagamaea o feagai ma le tatou Palemene. Ui i lea faaoga ia le avanoa ua maua e fai atu ai sina tala. Ae faatalofa foi i le paia o le tatou Palemene i lau Afioga i le Fofoga Fetalai, le Palemia, le Sui Palemia ma le Kapeneta ma le lavaloa o le Palemene outou tupu ma ee, o sui filifilia, o lupe foi na fia mai le fuifui mai itumalo e fia o Samoa.

E faatalofa atu foi i Le Ao Mamalu o le Malo, le Sui o le Fono a Sui Tofia ma a oulua Masiofo, le tapuaiga a Samoa i le aiga Sa Levi o nonomanu aua Samoa ma lona lumanai, le faafofogaaga a Samoa aua Aiga ma Tama, o Tama foi ma Aiga, Tumua ma Pule, Ituau ma Alataua, Aiga i le Tai ma le Vaa o Fonoti. E manatu lau Afioga i le Fofoga Fetalai e faapuupu'u atu se manatu, o le tele lava o mataupu sa oo i ai se lagona ua uma ona faaleo e le toatele o sui usufono, o le ala foi lea sa manatu ai o le a olo pea le fua ma taputapu'i le Fonousu a le atunuu. Ae masalo o se mataupu ua laualuga pea i finagalo o sui

usufono mamalu, o auala galue lava. Manaia le faataitaiga na aumai i le taeao, o auala i Falealili afai e oo atu i le 100, 50 itumalo, 500 auala. Afai e 10 auala e fai i le Paeaiga, ia po o se tualga faapena, o le matua ou le iloa lava po o le fea taimi e faasopolia ai le tatou atunuu i auala galue, e le gata i lea ae po o fea foi le Paeaiga, a o le mea ua ou mautinoa e le o le tatou taimi. Na pau lea o le mea ua ou mautinoa. E i ai lava le finagalo sa aumai i lumamea ma faataoto atu e le Malo e ala i lau Afioga i le Minsita o Galuega, teu tatou auala galue, se teuteu, aua o le umi ona tuu, o le tele lava lena o le afaina ma ua le mafai foi ona uia auala o isi nuu i le talanoa ona ua matua tele le faaletonu e i ai. Ae o lata lea fautuaga i lau Afioga, se i silasila ane i ai pe le o se mea lea e ao ona fai, teuteu o tatou auala galue, faaleleia vaega ia mafai ona toe afifio ai le nuu agai i uta e gagau le vaomatua. Ia o lata lea tuualalo ou te lagona foi e le o se mea e fou i lau Afioga i le Minisita, faapea foi le tatou Malo, a o se mea e faatupu manatu, se i silasila i ai pe le o le faiga lea e vave ai ona toe foi mai loa lea, alu atu loa lea auauai ona faataina pe faitau fia miliona lona tau, a o le teuteu, atonu e le atoa se \$100,000 e faatino ai auala galue. E pei o lata lea faatupu manatu i lau Afioga, a o lena e i ina le atoaga i lau Afioga ma le paia o le Palemene.

O se tasi o mataupu sa feagai nei ina ua malolo atu le tatou Fono, sa tau faatumu forms a nai faiaoga e ave ai e resitala i o i le asosi o faiaoga. Atonu e aoga lea avanoa e fautua atu ai i lau Afioga i le Minisita aua o nisi o nei faiaoga e 20 i le 30 tausaga o faiaoga a o lea e feoai e tau faia tu ni nai reference po o ni tusi foi nei e ono fesoasoani ai e resitala ai latou, o le resitala o faiaoga. E pei o le tulaga lea o lea e faatino i le taimi nei. O nei faiaoga ua fia sefulu tausaga o faiaoga, ia se i silasila i ai pe le tataua ona otometi lava le o o nei faiaoga o i ai ma faiaoga ua mautinoa. O nisi lava o Pule Aoga, a o lea lava e aumai le form e tau faatumu atu e lagolago ai lana resitala o ia o le faiaoga, ae silasila i ai lau Afioga o lena e i ina le atoaga atonu e fesoasoani ai i nisi faiaoga e fotuai mai e omai fafo pe omai mai le ekalesia agai le Malo. E le iloa po o se tulaga lelei lena e silasila loa i ai e faatino ai le faatinoga lena. Ae o lau lea tuualalo ona o nai faiaoga oka se matutua. E le iloa po o nisi o nei faiaoga e matutua atu ma leva ona faiaoga na i lo latou o saofafai i le council lea o lo o taua e faauluulu i ai faiaoga. O nai mataupu ia e lua ona e le i afea e nisi o saunoaga lau Afioga i le Fofoga Fetalai.

Le paia o lou itumalo, le paia o le Aiga Tauaana ma la outou Tama, ua ou manatu ua maualuga lava le agalelei o le Alii i le tatou itumalo, o le tatou Tama la e saofai mai le nofoa, o le faaeaea foi lena a le Malo ma le atunuu atoa i le tatou itumalo. Ia o le mea la lea le tatou itumalo faapea foi le tapuaiga a si ou nuu i Samatau i le afifio o le Falefa o Alii faapea foi le Saofaiga ia te oe Leulumoega, ia manuia tele le tausaga fou ma lenei tausaga ua tatou savalia, tatou tapenapena lemu, sauniuni lemu, e i ai se taimi tatou feiloai, fai se tatou tala. Ae manuia tele le tausaga fou, manuia le Fonotaga a le Palemene i lenei afiafi.

SUI FOFOGA FETALAI: Ua ou manatu e ao ona faamanino le vala lea o le soo ai o taiao o le tulaga o lauga, o le tatou galuega e fai faatasi. O le va nonofo ai o le Nofoa ma le mamalu o le Maota. A o le agaga o le Nofoa ua fia faateleai le galuega. Ae o lea ua e saunoa i tulaga ia, e leai e pule lava le sui usufono mamalu ia i lona finagalo pe lauga pe leai foi. A o le agaga o lea e tuuavanao le Nofoa, manumanu i le nonofo ma le faafofoga mai o itumalo taitasi. Aemaise foi o le isi vala lea, o lea e live a tatou Fonotaga i luga o le TV. E manatu tele atu le Nofoa i lo tatou nonofo ai. A o le galuega ua fia oo i le Taitaifono o le Komiti o Tupe ona sauna loa lea o le Kapeneta e tali i manaoga o le Maota. E ui i lea, e pei na ona ou fesoasoani atu faapena, ae o le agaga lava ia, o lena e i i na le faitalia. Pe lauga pe leai, a o la e tapuai itumalo. O le nonofo ai o le Nofoa ma sui mamalu, o le agaga lena. Malo saunoa malo foi lauga i le sui mamalu mai Samatau ma Falelatai. Tulai mai le sui usufono mo Faasaleleaga Nu 4.

Afioga PESETA VAIFOU TEVAGAENA (Faasaleleaga Nu.4): Ua faamalo saunoa i lau afioga i le Fofoga o le maota. I lenei itula o le afiafi, ou te faatalofa atu i lau afioga i le Fofoga Fetalai, faatalofa atu i le Taitai o le Malo, lau Afioga i le Palemia, lau afioga i le sui Palemia, le mamalu i le aiga Kapeneta faapea foi le mamalu o le usugafono a le atunuu. Faatalofa atu foi i le paia ma le mamalu i Ofisa Sili o Pulega o Matagaluega o le Malo faapea foi le tapuaiga a si o tatou atunuu. Lau Afioga i le Fofoga Fetalai, faafetai ua maua le avanoa o lenei itumalo. Atonu o la e faafofoga mai si ou itumalo. Lo tatou itumalo faamalo tapuai, e ui lava ua leva tatou te le i toe fesilafai. E aumai lava e le Atua le taimi tatou te feiloai ai. Ae faamalo tapuai, o lea ua tatou taunuu mai i lenei foi tausaga mulimuli o lenei foi Paeaiga, tatou faamoemoe i le Atua mea uma.

Lau Afioga i le Fofoga Fetalai, ua tele manatu, tele foi sanoaga e uiga lava i le faamai sa feagai ai ma lo tatou atunuu. Ma e i ai le pese a le ekalesia, e le tupu fua mea faapena. E tele foi nisi o saunoaga ma faasalalaua i nusipepa, i lenei faamai e faasaga lava i lo tatou Malo aemaise le tatou Matagaluega. Ae pei lava na saunoa se tasi o sui usufono, i le taimi analeila. O mea ia na fetalai i ai lo tatou Alii o mea ia o le a tutupu i le lalolagi. O le a fetai i tatou ma puapuaga. O faamai, o oge, mafuie, o le sii taua o isi nuu i isi nuu, o isi malo i isi malo. Ma e tatou matau i popolega sa i ai si o tatou atunuu, ae ou te manatu. Ana se i o tatou toe manatu lava, toe fesili lava i lo tatou Alii, i mafuaaga o nei mea uma, ae o le tali lea. Aua ne i o tatou tau le pua ma lafo i nai o tatou fomai, i le Matagaluega o le Soifua Maloloina o le tatou Malo. O mea uma ia ua tulai mai, o galuega ia a le Atua ma le plan lea a le Atua ua uma ona faataatia, o lea e aumai i le Luka, faitau le tusi lea o le Luka. O lea ua uma ona ou fai atu, o le plan lea a le Atua ua uma ona faataatia i le lalolagi tatou te ola ai. O le a oo mai mafuie, a

lea ua faafia, ua faafia o o tatou faalogologo i mafuie i si o tatou atunuu. Aumai le oge, o le 1962 na oo mai ai le oge sili ona matuia i lo tatou atunuu.

Ma o le a ou talanoa atu pea i mea na tutupu i lou nuu. Na saunoa soo lava le Palemia i le upu lea, i le mea lea o le kopai, ou te talitonu e sao uma lava lo tatou atunuu i le mea lea. O le kopai mai le taeao, kopai le aoauli kopai le afiafi. A o le mea matautia o nai o tatou tuua matutua. O lou nuu e ola ai tele le taamu lea e tau o le taamu faga, ou te le iloa pe malamalama ai le toatele. O le taamu lea, e oo lava i puua tulou, latou te le aia, mafua i se a? ou te taua le taamu lenei, o le vailaau fagavao. E oo lava i tagata soifua e le mafai. O la e faafofoga mai lou nuu ma lou itumalo. Ua taumafai e saili, saili se meaai, na iu lava i le mea lea. Na iu lava i le taamu lea ou te fai atu. O le mea tonu lea e ai ma loimata, aemaise lava nai matua matutua. Aua foi a avatu le alaisa e le taumafa, avatu le kopai e le mafai. Ua iu loa, ua oo lava i taamu ia sa masani ai ua leai se mea. Ua oo mai le oge lea e aumai e le Tusi Paia. Vaai i le finagalo o le Atua, e pei ona ou fai atu i le taamu lea, **it's a weed killer**. O le vailaau fagavao, ae na ai lava e lou nuu, ai ma loimata. Le alofa o le Atua i si o tatou atunuu. Faapea ea na i ai se tasi na maliu ai, o tuamaota o aiga, ou te fai atu, e pei lava o tala ia e aumai i nuu mamao. E pei lava o tua o Iraq, Iran, pupu faasoloatoa, eliga ufi vao e tau i le tuasivi. O mea ia o lea ua tatou vaai i ai, ma o le ua tutupu ae o mea ia o lea e fetalai mai ai lo tatou Alii. O mea ia o le a tutupu i le lalolagi, o le oge, o lea ua aumai ma faamai. E le faatoa tupu lenei o faamai.

O le tausaga lea na tea nei i le malo o Aferika e silia ma le 6,000 tagata maliliu o le malo tele o Aferika, i le mai lea o le misela. Ae ou te faafetai i le Atua, ona o le puipuiga o si o tatou atunuu. O le matou tatalo, i nai matua ua motusia ma nai a latou fanau ona o le valaau a le Atua ona o ana galuega foafoa, alofa le Atua ia toe foai nisi tamaiti. Ia toe foai mai nisi pepe fou, aua o mea na ia faia. O lea ua tatou molimauina le moni ma le faamaoni. O mea lava ia na fetalai i ai Iesu i ona soo, a o le i oo mai le gataaga. A lea ua faatino, o lea ua tatou molimauina ma tatou vaavaai. O le mea lea, soia ia tatou te tusitusi lima leaga o galuega a le Atua. Sa ou faalogo foi i se tasi o finagalo, e tau fai le komisi suesue. O sau tuualalo, a fai le komisi suesue o galuega a le Atua. Tatou te suesueina le finagalo o le Atua, o lea ua ala mai i lenei faamai. O mea ia, e le o ni faamai e mafai ona fai e se tagata soifua. E le mafai e se isi o tagata soifua ona faatupu ni faamai. O le mea e pule ai lo tatou Alii.

Tofa Olo Fiti Afoa Vaai: Lau Afioga i le Fofoga Fetalai,

SUI FOFOGA FETALAI: Malie le sui usufono o lo o saunoa, se i tulai mai le sui o Salega.

Tofa Olo Fiti Afoa Vaai: E na ona ou fia fesoasoani atu i le sui Palemia, oi le Palemia lagolago. E talanoa tele le afioga i le Palemia lagolago i le mea lea o le Tusi Paia. Ae o lea ou te faalogologo atu, e faalelava tele. E malamalama uma lau Afioga i le sui Palemia po o le Palemia lagolago? O le mea lea o le faamai, o le mea a le tiapolo, e le o se finagalo o le Atua le aumai o se faamai, ia aafia ai le soifua o ona tagata na faia i lona faatusa. E pau lena o le mea o lea ou te fia fesoasoani atu ai ia te oe, o lena e te sese i le mea o lea o le Tusi Paia ma le faaaloalo.

Afioga Hon Faumuina Tiatia Faaolatane Liuga: Lau Afioga i le Fofoga Fetalai, o le mea e fia faasao. E sao le sui o Salega, o le mea a le tiapolo le mai, pe a faataga e le Atua. O le mea lena na fai ai le Atua ia Satani, alu i lau tama o Iopu la efai mai a e le puipuia, ou te matua faia lava i le ofe ia matua tigaina. O le mea lena ua fai, ana le faatagaina e le Atua e le mai Iopu ma lou faaaloalo.

SUI FOFOGA FETALAI: O lea o le a fai a tatou aoga Tusi Paia, ae tuu le tatou mataupu, malie lau afioga i le sui mamalu, o lea foi o le a fautuaina le sui o lo o saunoa, e faasee, o lea ua maea lana saunoaga.

Tofa Olo Fiti Afoa Vaai :Na ona toe fesoasoani atu, na o le pau lava lea o le tagata na fai i ai le faataitaiga. E pei o se aoaoga lena a Iesu, na o Iopu, na o le pau lava lena, ao se isi lava tagata e le i toe faia i ai. O le taimi la lena e pei ona ou fai atu, o mea uma lava ia o faamai, o mea a le tiapolo e osofaia ai galuega a le Alii. Ma le faaaloalo.

SUI FOFOGA FETALAI: Malie le sui usufono o lo o saunoa...

Afioga Hon Faumuina Tiatia Faaolatane Liuga: Lau Afioga i le Fofoga Fetalai e le na o Iopu, o la e fai mai Iesu, faaoga lou igoa, ou te tutuli ai temoni, ma faamalolo mai ma faasavavali pipili, faalogo tagata tutuli. E le i taofia Iopu, na faaauau e Iesu. O lea foi e faaauau e tatou. Ma lou faaaloalo.

Tofa Olo Fiti Afoa Vaai :Le suafa o le Tama ma Iesu....

SUI FOFOGA FETALAI: Malie sui usufono, o lea ua matua manino lava. Na matou o foi i le Tusi Paia, ae o le mea lea faataoto ia lea mataupu. Malie le sui mamalu tulai mai. Se see ese ia ma lea mea, ae faaauau nisi o mataupu..

Afioga PESETA VAIFOU TEVAGAENA: Lau Afioga i le Fofoga Fetalai, sa ou manatu lava lau afioga, e tuu mai se avanoa sei ou tali atu i sui mamalu ia e toa lua, leaga o la e faalogologo mai si ou itumalo, o la foi e faalogologo lo tatou atunuu. Leaga o le mai lea ua mafatia ai lo

tatou atunuu, e le se mai faigofie. E tatau ona faafofoga le atunuu, aemaise o auaua o le talalelei o lo o faalogologo mai i mea ia ou te fai atu ai. Leaga o le Tusi Paia lea na tuuina mai i le taimi na tauto ai.

SUI FOFOGA FETALAI: Sa tau avatu le fesili pe na e sau ma lau Tusi Paia.

Afioga PESETA VAIFOU TEVAGAENA: E fau o tatou manatu i le taiala lea a le Atua. Lau Afioga i le Fofoga Fetalai leaga o lea ua aumai le faauilavea a si ou uso ia Olo, faitau lelei le Luka lea amata mai le amataga e tau i le faaiuga, faapena foi si ou uso ia Faumui.

SUI FOFOGA FETALAI: O lea ua maua e sui usufono mamalu. Malie le sui usufono o lo o saunoa se i faautagia se fautuaga a le Nofoa. Ia, ua tatou iloa uma mea ia e te saunoa i ai, ae faasee ese loa ua...

Afioga PESETA VAIFOU TEVAGAENA: Faafetai ua e tuu maia se avanoa ou te tau atu ai le suafa o le Atua ma Lona finagalo. O au, e momoli lau faamalo ma lau faafetai i lau Minisita po o Afioga i le Palemia. Ma sa foufougata lou tulai atu, ae sa ou manatu lava e i ai se taimi ou savalivali i le ma Ofisa se i fai lau faafetai. O le Afioga i le Palemia, sa ou faapea lava au e le o se fomai, sa ou manatu lava e le o se fomai le Afioga i le Palemia. O au o le 12 lenei o tausaga o ou mai lea o le psoriasis, ave au i Niu Sila, Amerika, e le maua se togafiti. Ona ma malaga foi lea ma le Palemia ma si ou uso ia Tafua i le fonofoi lea i New York masalo po o le 2013, faatopetope ai foi au i le falemai. O lea e molimau le Afioga i le Palemia, e le i maua se togafiti, ave ai foi au i le falemai faapea mai le fomai, e i ai le treatment o lea e taumafai i ai le Malo o Amerika a manuia suesuega ona aumai lea i Niu Sila ma isi atunuu e lata mai i le Pasefika, aua la le mai lea. O le faalavelave o fualaau ia ou te inu ai, o fualaau e afaina ai le liver. Masalo o lena ua faitau lau Afioga i le Minisita o le Soifua Maloloina i lipoti a le falemai, o lea foi ua i luma o le Afioga i le Palemia. O le lipoti a le falemai, ua afaina le liver o lou tino, ma ua i ai le treatment ua taunuu mai, a o le faalavelave e fai si taugata. E fai lava lau tala, o fomai e gata ai fomai, maualuluga o faailoga, o le maofa lea ia te au. Ou ui mai loa i le fomai lauiloa foi lea e maualuluga lava faailoga o Asiata lea Viali, ia fai mai foi lea o le fomai ia te au, Peseta, ua ou iloa e sili ia ona talosaga le Malo mo se fesoasoani. Ona tusi loa lea o le fomai i le Afioga i le Tamaitai Minisita o le Soifua Maloloina, ae kopi le Afioga i le Palemia. O le aso lava na taunuu ai le tusi lea i le Afioga i le Palemia tuu mai ai ma le avanoa ou te alu atu ma te talanoa. Ona fesili mai loa lea o le Afioga i le Palemia ia te au, ou faamalamalaina loa lea o lo'u mai, ma o le mai foi e leai lava se togafiti. Ua iloa foi le liver is a blood. E le mafai lava ona fai i ai se togafiti. Ia, o le mea na ofo ai lou nei sui usufono, na ona faamatala atu lava ae fai mai loa le Palemia ia

te au, Peseta, na pau lava lea o le togafiti, o lea ua ou faamatala atu i ai, a fai tui nei, ae fai mai lau Minisita, Peseta ou te alofa atu, o le tele lava o tui nei ua afaina ai le toatele, ae o le a ou tau atua le togafiti lea e manuia ai lou mai. Sau e te inu le vai lea, ou tilotilo atu, lea ua ou le vaai atu i le vai a le Afioga i le Palemia. O lea ua ou vaai i le vai lea, lea e tau nei e tatou o le kanger water ea po o le a le tau o le vai.

SUI FOFOGA FETALAI: Malie le sui usufono toe lua ou minute. Malie le sui usufono se i saunoa le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fetalai, o le vai la lea na ou faatonua ai leoleo e loka mai le tagata foi lea, aua le toe faataua na o le mamai ai o tagata i le mea lea o le misela. Ae na o le pau lava lea o le tagata ou te faataga ou te togafitia i le vai lea, na o ia, i te i ua tou tumutumu atu taeao, leaga o au mea e sauea, a tau ane ai lava, na o le pau lava lea o le tagata ua ola ai.

SUI FOFOGA FETALAI: Ia faamaea mai loa le saunoaga le sui usufono mamalu.

Afioga PESETA VAIFOU TEVAGAENA: Lau Afioga, o le taua ia o le tala lea ou te tau avatu, e faaataata a lafoga, ae o le agaga foi lea lea e tau aumai e le Palemia ia aua ne i ou faia le tulaga lea ua aumai e fomai, ae lelei lou tago e fai le vai lea, tago e inu. E faaalua mai foi la e le Palemia ia te au, e tolu lava lita lea e taumafa e le Palemai i le aso. Fai mai, sau e alu, alu e sue le ta vai lea ona e tago lea e inu, e te vaai e tea lou mai. O le mea lea e ala ai ona fai atu lau tala lau Afioga i le Fofoga Fetalai, toetiiti 20 fomai specialists ua vaai au, a o fualaau matautia ia eseese ou te inu ai, a o le mea lea ua fai mai Dr Tuilaepa Sailele Malielegaoi, ou te tago e inu le kanger water, ua ou faapea, oi ta fia ola e masalo o le a vave i i ona uma lou ola. Ae na ou usitai.

SUI FOFOGA FETALAI: Faamaea mai le saunoaga, masaloo lea ua tatou taunuu i le taimi o le tatou malologa. Faamaea mai faamolemole lau Afioga i le sui usufono mamalu.

Afioga PESETA VAIFOU TEVAGAENA: Na ou alu loa la sue le mea e faatau ai lau vai lea, e i ai la lau uo ma te tuaoi, fai mai, lau tama faipule lea e i ai, e number one le vai lea e i ai. Ou fai atu, o ai le faipule? O le Afioga ia Alaiasa. Ou te le pepelo. Lau Afioga i le sui usufono mo Anoamaa Sasae masalo e te le iloa lau uo na alu atu ia te oe e ki mai ni vai se i ou inu ai. Faafetai i le Atua i lou fesoasoani, ou te le iloa pe na tau atu i lou alo po o lau Afioga po o lou faletua. Faafetai i le vai na e aumaia. O le vai lea na e aumaia na ou manatau ai lou igoa

lea na ou igoa ai o le Vaifou. Na ou inu loa i le vai lea, a lea ua ou toe malosi. E oo mai i le taimi nei, ae, Im coming back.

SUI FOFOGA FETALAI: Oo loa i le itumalo ma faamaea mai. Ia o le mea la lea... Malie le sui usufono se i... malie Lufilufi na o le faafetai e leai lava se isi vaega, o le faafetai aloaia... Malie le sui usufono mamalu se i saunoa le sui usufono mo Anoamaa Sasae.

Afioga ALAIASA MUAGUTUTIA MOEFAAUOUO MALAGAITUTOGIAI SEPULONA MOANANU: Lau Afioga e taua le faaaliga a le sui usufono mo le silafia e le tatou Maota, leaga o le agaga lea o tatou, a maua manuia ona nana lava lea e ia. Ae pei o lea ua faasoa mai foi le Afioga i le sui usufono mamalu ae tatau ona faafetai muamua i le Dr lea na mafua ai ona avatu le malamalamaaga ia te ia. A o se fiafiaga ia te au. Ou fai atu i lau fanau, ki, ave fua uma vai ia ia vave ona foia le faatafagasegase o le alii, ae talosia ia umi. Ae afai o lea ua toe back lau uo, ia manatua mai au pe a maua sau mea. Ia manuia le tatou Fono.

Afioga PESETA VAIFOU TEVAGAENA: E le toe umi lau Afioga i le Fofoga Fetalai. A o le taua o lau tala lea e fai atu, o le fesoasoani ma lenei foi meaalofa taua ua tuuina mai e le Palemia o lea ua ou toe malosi ai. Atonu foi e aoga lenei tala ou te avatua e aoga mo i tatou uma lava, aua tatou te le iloa, e tele togafitiga, ae aumai lava e le Atua togafitiga tatou te manuia ai e pei foi la o le misela, ioe. Ua alu alu, o lea lava ua aumai e le Atua le taimi, ioe, o lea lava ua mou malie atu.

Lau Afioga i le Fofoga Fetalai, e ui lava i le tele o sou manatu e tau faafetai ai i Afioga i Minisita. Lau Afioga i le Minisita o Tupe, faamalo limalelei i lau faasoa. Ua manatu foi lenei itumalo, o lea ua e faatofutofusia si ou itumalo i auala galue. Ia ne i mea foi ua tatou mafuli e tapena i le toe foi mai, ae tatau foi ona tatou tapenapena i le le toe foi mai.

Lau Afioga i le Fofoga Fetalai, e lagolago lava e lenei itumalo le Tala o le Tupe a outou Afioga i Minisita faamalo galulue. Ioe, e faapea foi i le la itu o le malu. Faamalo i le tatou mafutaga ma tatou galuega fai. O tiute uma lava, o tiute mai le Atua. Faamanuia le Atua i lau Afioga i le Fofoga Fetalai faapea foi le usugafono a lenei Palemene ma Ofisa Sili o Pulega o Matagaluega a lo tatou Malo. Soifua ma ia manuia.

SUI FOFOGA FETALAI: Talu ai ona o lea ua tatou taunuu mai i lana malologa masani mo le 15 minute, ou te faasilasila atu ai o le a faataatiaese Galuega a le Maota mo lana malologa masani.

Na faataatiaese Galuega a le Fono Aoao Faitulafono i le itula e 8:11ma toe faaauau i le itula e 9:07 i le po.

Na toe faaauau felafolafoaiga ale Fono Aoaofa Faitulafono i luga o le faitauga faalua o le Tulafono Tau Faaofi o le Faatatauina o Tupe Faaopoopo (Nu.1) 2019/2020.

SUI FOFOGA FETALAI: Ou te faasilasila atu ua toe amatalia nei Taualumaga o le Fono Aoaofa Faitulafono. E faataatiaese Taulaumaga o le Fono Aoaofa ua maea saunoa le sui usufono mo Faasaleleaga Nu.4.O le avanoa lelei lenei mo le saunoaga a le Sui Taitaifono o le Komiti Tupe a le Palemene. Tulai mai lau Afioga i le sui usufono mamalu mo Palauli le Falefa.

Afioga Hon FAUMUINA TIATIA FAAOLATANE LIUGA (Palauli le Falefa): Faafetai i lau Afioga i le Fofoga Fetalai mo le avanoa e fai ai foi se sao o lenei itumalo i le Tala Faatatau Muamua o le Tupe, ua uma foi ona siitia le tatou faasagi ma le faamanu i le Atua i le taeao ua mavae atu. Faafetai i le faatautaiga o le tatou Fono lau Afioga i le Fofoga Fetalai. Ou te iloa o la foi e faafogafoga mai le Afioga ia Leapepe o le sa taimua i lenei taeao mo le viiga o le tatou Matai i le lagi. O lenei foi aso o se aso ua saunia e le Atua tatou te fefaasoai ai ma fetufaai outou finagalo ma se lagona aua se manuia mo Samoa. Si ou itumalo Palauli le Falefa faafetai mo lau tapuaiga, faafetai tatalo. Taitai o Ekalesia e fia i totonu o si ou itumalo, faamalo le tapuai mai, faamalo foi tatalo. E muamua ona ou faafetai atu i le Malo i le Afioga i le Palemia ma le Aiga Kapeneta mo galuega lelei ma le tetele ua faatinoina ma o lo o faaauau pea ona faatinoina aua se manuia o o tatou tagata nei ma le agai atu i le lumanai. E muamua ona ou avatu le faafetai tele i le Matagaluega o le Soifua Maloloina, o se laolao lelei lenei e fai ai se faamatalaga i lau afioga i le Minisita, Lau afioga i le Palemia ma le Kapeneta mo le faafoeina o le tatou tuatuagia foi i lena faamai sa pesia ai si o tatou atunuu. So o se mea lava e tupu, e i ai aoaoga e maua mai ai. Soo se Malo foi e fetotoai, e faapena ona le tumau. So o se Malo foi e galulue faatasi, e ogatotonu le alofa i ona tagata. Faafetai i le Faatonu Sili aoaofa o le Matagaluega o le Soifua Maloloina ma le Minisita ma le Minisita Lagolago. Ou te faafetai foi i le Minisita lagolago o Tina ma Tamaitai, o le matua aoga o faatalanoaga ma ua atili ai ona faaosofia le galulue faatasi, ma faamaise ai foi i nai aiga ua afaina o latou alo ma fanau ona o le mai misela. A o le aoga foi o le mai misela, ua iloa ai le anoanoai o isi mai pipisi e tatau foi ona puipuia. O lea ua uma ona faataatia le tulafono ua matua maioio lelei ai lo tatou sauniuni i nisi mea e tutupu mai i le lumanai. Tatou te le silafia ou te le iloa, na o le Atua na te silafia o le tatou lumanai.

Lau Afioga i le Fofoga Fetalai, o le a muamua sau tala i le faafetai atu i le galuega fai mo si ou itumalo. Ou te faamalulu atu foi i le toe toloina

o le umusaina po o le faapaiaina o le vai i si ou nuu o Gataivai. Lau afioga i le Fofoga Fetalai, o lenei atinae e le o se atinae na tupu nei. Na amata mai lava i le Nofoaiga talu ai, ae ua oo atu le faasologa ia te au, ae toe lua masina fai le palota lea na fai nei i le 2016. Ona ou talosaga lea i le pulega, e tolo le faia o le galuega, ona e le lelei le faia o se atinae ae ua loma le palota. E pei e foliga ai, o lo o ou taumafai e fai se faatosina i tagata o si ou itumalo. Na talia lelei ma o lea na faifai malie mai ai lava. E pau lava lau tuualalo i lau Afioga i le Palemia ma le Kapeneta aemaise foi o Minisita o lo o feagai ma atinae i nuu i tua. Se i logo muamua le faipule e ona le itumalo. Ana ou le faalogo i ai i luga o le vaa ou te le iloa o la e i ai se fuafuaga, e afifio atu lo outou mamalu ma faipule o le Palemene e faia lea tulaga. E pei e manaia se...at least e lua vaiaso e logo ai le faipule, aua e le mama foi i le faipule lo outou afifio atu. Aua o le a lava se mea e saunia e le afioaga ma le tama o lena foi itumalo, e tali ai lo outou afifio atu, ma amanaia ai galuega fai mo le lelei lautele o si o tatou atunuu.

Faafetai mo le auuala galue o si ou nuu o Sili lea ua fuafuaina, leiloa pe faatinoina i le masina fou. E faapena foi ona tuuina atu nisi mea, ae o lea o le a ou taua atu ia oe mea e fesoasoani ai ia te oe Papalii, e fai uma lava mea ia e fai atu ai sui usufono. Aua o lea e i ai tatou o tupe ma taga tupe, ae le o silafia e le tele o faipule. Ae ou te iloa o le a faamatala mai lava e le Afioga i le Minisita, le tulaga o i ai.

Faafetai tele Sili mo le Tala o le Tupe, o lea e tele ina ou maua, fai mai isi faipule e laititi, ae a e tilotilo i tua i numera ma fuainumera ia e aumai, ou te iloa e ova i le \$200miliona po o le \$300miliona le aoga o nei tupe mo le atunuu. Avatu nai mea ia e lagolago ai lou taofi lea. O le budget lea e talanoaina nei, o le tele o faamanuiaga ia pe a tatou vaai lava na o luma i tupe, tatou te le iloa le loloto lea e i tua atu. Faataitaiga, o le \$64,000 lea e avatu e faatotoga ai le ofisa o Ausetalia mo le RSE, o le tele o le aoga o lea tupe. E le gata ina faalelei ai le Ofisa o le sooupu, ae faapena ona tapue ai o tatou tagata o lea e o atu e saili avanoa, ma faatupulaia avanoa e faamanuiaina ai o tatou aiga. E tasi lea,...e \$64,000 ae o le aoga lena e i ina, o le a faatupulaia ai galuega ma maua ai foi le tagata e fesoasoani i o tatou tagata lea e maua i le mai manatu. Aua a leai se faatama e tua i ai nei tagata, o le mea lava lena e tupu, lua masina tolu masina ae fia sau i Samoa. Faapea ua manatu atu tamaiti ma le loomatua. O le isi vaega taua lea e i. O le \$92,000 lea e aumai e siitia ai ma amatalia ai galuega, siitia mai ai le Ofisa o Faamasinoga mai Tuasivi i Salelologa, o le matua tele o tupe o le a faasaoina e tagata. Aua foi e le toe o mai toe o i le pasi. Sefe le taimi e faatali ai le pasi e sau i Salelologa. E tasi lena aoga mo tatou tagata. O fesoasoani nei a le Malo, a faatele la le aoga o nei tupe, o le a toatele tagata e le toe tologia le isi \$3 e alu ai i Tuasivi ma le isi \$3 e sau ai i Salelologa. O le a faapena foi, ona atili ai ona lelei le maketi i Salelologa, e le gata o faleaiga o faleoloa ma mea faapena, o le a ogatotonu i ai le vaega lea. O le isi vaega e tilotilo i ai o se

faamanuiaga, o le faaopoopoina o faamasino o Fanua ma Suafa. E tasi lea aoga, o lea lava ua mulimuli le Palemene i lana anavatau, o le faaleleia o lea itutino o le Tafatolu o le Faigamalo. O le isi vaega ou te vaavaai au i ai e fai ma pine o lau tala, o se faamanuiaga mo tatou tagata. O se faamanuiaga mo le tatou atunuu. O le fomai lea ua aumai mo le falepuipui i Tanumalala, e 48 i le 6 masina. O lona uiga e \$96,000 i tausaga taitasi. O le a faaititia ai foi le feoi mai, o taavale e aumai pagota ma toe faafoi, ma le avanoa e sosola ai, pe afaina ai se soifua o se tagata. O le isi mea e iloa ai le faamanuiaga lea e i totonu o lenei paketi, o le \$10,000 lea e faatau ai le masini, e faamaumau ai faatau o aso taitasi i le faleoloa. O lona uiga o lea ua naunau le Malo ia fesoasoani i le faamaumauina o nei mea, ia faateleina ai tupe maua a si o tatou atunuu.

O le isi vaega e masani ona ou fesili ai i le Matagaluega o le Soifua Maloloina, o le....pe fia se waste vailaau a le falemai, o le latou tali e le mautinoa. I le tulaga lava ia o falemai, e leai se falemai i le lalolagi e leai se waste, ae tatau ona iloa. O lea la ua appoint ai le tagata lea o le a taitai i le faleoloa pe teu oloa e teu ai vailaau. O lona uiga o lona tagata e tatau ona mataalia, ia le gata ia faaititia vailaau lafoai ona ua le aoga ua expire, aua e le uma ona faaaoga. O mea ia o estimates, e i ai taimi e le lava ai, ae i ai foi taimi e ova ai. O le isi faamanuiaga lea e i ai lau Afioga i le Minisita o tupe, o le \$250,000, o lea o le a totogi ai sikolasipi o aiga lima vaivai pe qualify i lalo o faiga po o criteria, se i tagai i ai, ina ia faaaogaina lona vaega. O le **academy** a leoleo, tasi lea laasaga. E laititi le tupe lea e aumai ai i i. O leoleo i i, e lima tausaga po o le sefulu tausaga talu ai, e te fealuai fealuai lava ua e fiu e sue sau galuega e alu loa e apalai i leoleo. E pei o se **career** e o i ai tagata ua fiu e sue galuega. A o le mea lea o le a tupu, o lea o le a amata ona siitia i luga le level e aaoaina ai o tatou tagata, o lo o taua o malu o le Malo. O le aoga foi lea o le isi vaega lea, aua a toatele o tatou tagata ua i luga aoga faaleoleo. Ua faapena foi ona faatoateleina ai avanoa mo a tatou **peace keeping missions**. E tasi lea mea o lo o tele ai foreign exchange a Fiti, ona e toatele a latou leoleo, e toatele foi a latou fitafita o lo o faaaogaina i peace keeping i le lalolagi atoa. O le isi vaega lau Afioga, o le togalaau na matou asia. O lea e i ai le faalauiloa lea e i lalo o le vaega o tupe e \$250, ao le togalaau lea foi e aumai ai le tupe e \$253,000. O le manaia ia o atinae ia. O vaega ia e faamaonia ai lau tala, e laititi lau Tala i le Tupe, a o ona faamanuiaga ia e i i, a faatupe le manuia e aumai ma sasaa mai i lo tatou atunuu, e ova ma le \$200milion. O le value added lona o le Tala o le Tupe lea. Faamalo faafetai i lau Afioga, faamalo i le Matagaluega o le Tupe, le failautusi Tupe, e le faatauva lenei Tala o le tupe ia te au lava. Ona o faamanuiaga ia e i totonu, o le matua tele lava. E lagolagoina ai e lenei itumalo le Tala o le Tupe. Lau Afioga i le Minisita o tupe, na ou vaavaai i Accounts ia ua tea 2017/2018, e tele tupe totoe o le manaia ia o le mea o le totoe. E lelei le totoe ae lelei foi le ova. E tusa o le 2017, e

\$101.1miliona le surplus. O le surplus sa fuafua i le estimate e \$23miliona. O lona uiga e \$77miliona le tupe ua faaopoopo i ai i tupe le faaaogaina, o tupe totoe. I le 2017 i le 2018 i le aofaiga atoa o accounts ia olea ou te fai atu ai, e \$31miliona le surplus, a fuafua i tupe local, tupe a tatou lava ia e ao, e \$67miliona le tupe e le i faaaogaina. Ae a pe a ave se afa o ia tupe ia Papalii, se i fai ai mea ia e talosaga mai ai itumalo. Ona e i ai mafuaaga. E i ai auala e le tatau ona alu i lalo o auala galue, e tatau ona alu i lalo o auala o le climate change 1. Na matou asiasi i le auala lea i le va o Vaiaata ma Patamea, o le auala lea e tatau ona fund mai lalo o le climate change, aisea? Aua e aoga le auala lea e relocate i ai tagata la e i Faasaleleaga ma tagata a e i o le Gagaemauga Nu 1, i uta i mea ia, talu ai le faatupulaia o le siisiitia o le suasami. O le isi auala e tatau ona fai i lalo o le climate change, o le auala lea i Faleaseela. E mai le vaitafe e tau mai i luga i Faleaseela uta, aua e tatau ona o mai tagata la e i lalo ua aafia i le siisiitia o le suasami. O lea ou te iloa e **roll out** le tupe...

FOFOGA FETALAI: Malie le sui usufono se i tulai mai le sui usufono mo Salega

Tofa Olo Fiti Afoa Vaai: Faamaluluatu lava i le SuiTaitaifono, manaia le faasoa ma le lauga. O au lea oute tau mafaufau i le tulaga o le \$100+miliona lea e saunoa i ai le sui Taitaifono. O le faafesiliatu lava, po o se mea o nitupeia e tetalanoa i ai, po o estimates foiia e le i faaaogainapo o le a.....pe i a e saunoa i le mea tau \$100milionaoute le..... a o leteleia o tatoumeaia e fiafaiae o lea e tau faasoa le....Ma le faaaloalo.

SUI FOFOGA FETALAI: Faafetai, se i saunoa le suiTaitaifono.

Afioga Hon FAUMUINA TIATIA FAAOLATANE LIUGA: Faafetai i lau Afioga i le Fofoga Fetalai. Faafetai foi i le sui usufono mo Salega i Sasae. O lea sa i ai le sui mamalu i le Komiti i le taimi lea na fai ai le review ina o le vaega lea, o lea foi e saina ai. O estimates ia e pei ona ou fai atu, e \$23miliona le mea sa fuafua, o tupe totoe. Ae ua uma ona **audit accounts**, ae aumai ua \$101miliona tupe totoe, ua uma ona audit accounts. O lea e te saina ai. Ma lou faaaloalo lava. Faafetai, e pei o mea ia e tau fai atu ai lauAfioga i le Minisita o Tupe, e manaia pe a faaova le tausaga lenei, toe faaova ma le tausaga mulimuli o le...o estimates ia e lua, o lea ua tele tupe ia ua teu i i, ia o le a teu la e faaoga e ai. O le lelei ia o le faaova e taugofie ai galuega i le taimi nei. A sefe la ia tupe nei, ae toe fai mulimuli galuega ua oso i luga le tau. O le lave lena, ma le isi mea ma le tele ai o nai tatou atinae foi nei, o faatoaga. O lea e afio mai le Minisita o Faatoaga, ua naunau lava e fai auala galue, ina ia **increase le production**, e le gata i le tatou lava atunuu ae faapena foi i le avatu i fafo. Aua o lea ua saunoa le tasi o

Minisita Lagolago ua tele maketi, ae leai ni mea e ave i ai. O le mea lea e taua ai Papalii lou faia o le auala lea i Sili, leaga e **organic** le matou nuu, e maualuluga foi **prices**, a o le mea lena e **high le productivity** o auala nei, e lelei le eleele lelei le palapala ma e galulue ona tagata.

Lau Afioga i le Fofoga Fetalai, e i ai le tulaga lea i tatou funds foi nei e aumai e fai ai faleaoga. Ua leva, ou te iloa ua lalata i le 30 tausaga i donors ia e i ai pei o le JICA, Iapani, Iuni a Europa ma isi e fesoasoani mai i le faiga o tatou faleaoga. O lea na o le \$300,000 le mea e aumai. O le taimi lena ua tele suiga i le faiga o faleaoga, ua tatau ona faaluaina, \$300,000 ma le isi \$300,000 ae faauma e le afioga e ona le faleaoga ia faleaoga ia. O lea la ou te tatalo atu ai e te lua galulue faatasi ai ma le Afioga i le Minisita o Tupe, aua e tatau ona toe faatalanoa donors ia e toe tuutuu i luga le latou fesoasoani, aua e le toe lava ni faleaoga i se \$300,000 i le taimi lena. O lea foi ua faaopoopo potu e fai ai computers, faaoga potu e fai ai ofisa o faiaoga, ua tele isi mea ua faaopoopo. Ma e tatau lava lau Afioga i le Minisita o Aoga ma le Minista o Tupe ona galulue faatasi. O le isi auala sa matou asiasi i ai o le auala lea i Tanumalala, na matou fautuaina le Miinsita ma le Pulega, fai le auala lea e pito mai i i le mea lea e tau atu ai... e puupuu e laititi ai le faaogaina o taavale, laititi ai le stress o tagata faigaluega, e tusa toeitiiti lava sefulu minute le eseese e te afe a ii i e tau i le falepuipui ma lou alu e te taamilo mai Lefaga. O le mea foi e lelei ai ua fai ai le auala galue i le la itu o le itumalo o Lefaga lena foi ua faamanuia ai nai na tagata, a o le auala lea e tele ina faasaoina ai aseta a le Malo aemaise foi o ona tagata. E puupuu, aua e mafai. E lua mea e fai ai, o le aua le faia se dividend a le SLC ae fai e le SLC le auala. A le o lea, o le cost share i le Matagaluega o le Falepuipui ma le SLC, aua la e ia i tenders a le SLC. A leai ave ia Papalii se tupe e faatino ai lena galuega ina ia faaoga lelei i ai le LTA aua o le LTA ua leai se LT ae toe o le A la e totoe. Ia, e manaia foi e tele ai galuega a Papalii ma tali ai i manaoga o tatou sui usufono ma itumalo, aua lelei lava o tatou auala, o le lelei foi lena o le tatou femalagaaiga. O le mea lena o lea e fai atu ai, se i fai lelei, o le tele ia o pupu o auala. O le isi taimi ta te alu ota musumusu ia Papalii, se se i fai atu le matou auala o la e o atu ai turisi e o i le Tradition ae o lea e matua tele pupu. Seiloga lava la e tau i le Minisita, pe lima masina o pupu, seiloga lava la ua alu alu lava ua fiu le taavale ona amata lava lea ona taumafai e faalelei. E faapena foi i nuu i tua. Lea na taua Falelauniu, a o lea e i ai le commercial foi lele, e ala ona pupu auala e leaga le faipule. O le a le mea a le faipule e fai i ai pe a leai se tupe e aumai e fai ai? E fiu le faipule, o lea foi na faafofoga mai nei a outou afioga o auala lava na o lea e fai atu ai le faipule. Ae leai se mea a le faipule e fai i ai pe a le ave tupe i aao o Papalii ma le LTA ma le tulaga lena.

O le isi vaega lau Afioga, o mea ia o historical sites lea ua tatou o nei, manaia le tulaga lea ua tatou o i le togalaau. O historical sites, o lou itumalo, o tala o le vavau la e i ai e matua maoae, e le gata o le papa o

le faatolotologatama lea na faaautama i tupu o le atunuu, o lo o i ai foi ma le vaisa na auai e Tiatia mai Manua, na o Tiatia na mafai ona aveesea le vaisa lea. A o le Tuitoga na oti aua foi e le i faataga e le Tuimanua. O le vai foi lea e aoga, ou te iloa e sili atu le vai lea pe a fai ai le gasegase o Peseta. A o lea la o le a ma o ma si ou uso e ave i a i i le vai lea, ou te iloa e vave atu aua o le tulaga lava lea, e le toe alu la i le kanger water, o le Tiatia water.

SUI FOFOGA FETALAI: Malie le sui usufono mo Palauli le Falefa, se i tulai mai le sui usufono mo Faasaleleaga Nu.4.

Afioga Peseta Vaifou Tevagaena: Lau Afioga i le Fofoga Fetalai, e manaia lava ma matagofie le saunoaga a si ou uso ia Faumui. Ou te le o toe popole la lau Afioga i se vai, ua lava a le vai lea e aumai e le Palemia ma si ou uso ia Alaiasa ou te ola ai. Ioe. O lea foi ua ou mafaufau ou te talatalanoa i lau Minisita, a oo foi ua ma fia malolo i nei mea, ma o e fai se ma clinic e aumai ni ma vai e sell atonu e tele ni ma clients foi nei e maua ai ni ma tupe nai lo le Palemene.

SUI FOFOGA FETALAI: Malie le sui usufono se i tulai mai le sui usufono mo Anoamaa Sasae.

Afioga Alaiasa Muagututia Moefaauouo Malagaitutogiai Sepulona Moananu: Lau Afioga i le Fofoga Fetalai, se i vasai foi le saunoaga a le sui usufono mamalu. Pei ua taliga lava e fia faalogologo, e ui lava ina i ai ma nai isi mea faalemoni ma amiotonu o lo o aumai ai ae manaia lava i le faalogologo. E tasi lava le matupalapala na to i le vaisa lea leaga o la e i tua i Falefa le vai lea. E leai se vai na ave e se Tiatia o le vai na omai ma le fanau a le Tuimanua aua le tamaloa Falefa. Ou te fia faasao mea ia leaga o la e i totonu o tala o le atunuu. O le isi mea, ou te manatua auala la e i Falelauniu, o le Minisita tonu lava lea na faia auala la e i Falelauniu, lea, Faumuina i le taimi o lona tulai mai i auala nei ae fai faapaole. O lea la ua pupu leaga faia lava nei auala ae o lea ua toe ita ai lava ia i ana pupu ma mean a... o lea ou te fai atu ai, se tatou saunoa foi lea e togi le saunoaga ae se i vaavaai i e na faia ia mea i o latou taimi. Aua o le vaveaga lea a le SLC i le taimi lena a o Minisita ai le afioga. Ia o lea o le a lafo mai le uluga iinei i le Malo ae faapena, ana lelei konekarate na faia ma fuafuaina mea na, o le taimi lenei o la e o lava i le atoa. O lea e le i atoa se sefulu tausaga o na mea. Ia ma le faaloalo e faapena lava ona fesoasoani ai e tusa ai ma le saunoaga.

A o le tulaga i le vai, o la e ua molimau mai, faafetai ua i ai se molimau ola o le aoga o le vai lea i le soifua foi o le uso ia Peseta, aua e te taumafa i le vai lea e fai mai ai Faumui ne i te i ua vave ona toe suia lou malosi e pei ona i ai. Ma le faaloalo.

SUI FOFOGA FETALAI: Faaauau le saunoaga, see ese ma ia mea o vai.

Afioga Hon FAUMUINA TIATIA FAAOLATANE LIUGA: Faaftetai. Ia o le a ou tali muamua ia Peseta. Peseta, o le ola lea tatou te ola ai, e i ai le taimi tatou te oti ai. O lau fesili la; ua e taliaina le faaolataga? Afai e te le i taliaina le faaolataga, ona e sau lea o le a ou tatalo mo le faaolataga ia te oe. Aua afai e te alu atu nei e oti nei, e te le alu i le ola e faavavau. Ia e talia le faaolataga ona e maua lea o le lagi. Aua tatou te le tumau iinei, na tatou omai uma lava iinei, tatou te toe o i le nofoaga tumau.

SUI FOFOGA FETALAI: E faamanatu atu i le sui usufono pau lava lea o le sui usufono o lea e fealuai ma le afioga paia a le Atua i lana ato i taimi uma lava.

Afioga Hon FAUMUINA TIATIA FAAOLATANE LIUGA: E te manatua foi le fetalaiga a Iesu, o mea la e fai mai ai e lelei, e tataua ona fai, a o a latou amio e fai, aua tou te ola ai.

Afioga Peseta Vaifou Tevagaena: Lau Afioga i le Fofoga Fetalai, napau lava lea o simea....

SUI FOFOGA FETALAI: Ia saunoa le sui usufono.

Afioga Peseta Vaifou Tevagaena: Leaga o lea foi e i ai le fetalaiga a Iesu, aua tou te ma e tautau atu au i tagata, ou te le ma foi e tautau atu foi oe i lou Tama. O le ala lena pei a faavae nai lauga foi, e amata lava i le Atua ma le Alii. O le mea lea ou te fia tali atu a ii lau Afioga.

SUI FOFOGA FETALAI: Malie se i tulai mai le sui usufono mo Faleata.

Tofa Lealailepule Rimoni Aiafi: Lau Afioga i le Fofoga Fetalai, o lena ua outou faafofoga ma ou faalogologo i le saunoaga matagofie a Peseta, e tasi lava le faaola lea ua i le loto Peseta, nao le Palemia. A lea na tatou faalogo i ai, ua ou toe ola ona o le Palemia. O lona uiga e le talitonu ia Iesu. E le faaolaina foi. A o le mea lea e saunoa i ai Tiatia, o lea e saunoa ia ia ma lana fomai po ua sauni. Ia ma le faaaloalo lava.

SUI FOFOGA FETALAI: O se mea e fia faamalamalama po o se mea e fia faasao?

Afioga Peseta Vaifou Tevagaena: O le mea e fia faasao. Leaga o lea ua saunoa si ou uso ia Leala, ae pau lava lea o le mean a faaii i ai le fetalaiga a le Atua ia taus ii ana taiala ma ana Tulafono. Na pau lava lea

ia tatou usitai i ana Tulafono. O lena e i ina Tulafono ia te oe ou te le tau fai atu.

SUI FOFOGA FETALAI: Ia se i tulai mai le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr.Sailele Malielegaoi: Lau Afioga i le Fofoga fetalai, e a pe a tatou talanoa ia i le tatou paketi o le a tuai ona pasi?

SUI FOFOGA FETALAI: Malie le sui usufono mo Palauli le Falefa o lo o saunoa, e lelei ona tatou see ese ma le Tusi Paia, o la e lava e ese a fale e talanoa ai ae tatou o ia i le tatou paketi o lea e fia faasolo le galuega a le Maota.

Afioga Hon FAUMUINA TIATIA FAAOLATANE LIUGA: Faafetai i lau Afioga i le Fofoga Fetalai o le a faapena ona fai, ae o lea lava tatou te i totonu o le Tala o le Tupe, e faavae i le Atua Samoa. O lona uiga, o lea lava tatou te siosio i le Tala o le Tupe ia faamanuia mai. O lea na ou talanoa i faamanuiaga lea e i totonu o le paketi lea. A faatupe mea ia e fananau mai i le mea lea, toetiiti lava maua le \$300miliona o faamanuiaga ia, \$23miliona, ae fanau mai ai manuia mo Samoa toetititi lava \$300 miliona pe a e vaai i tua atu o numera ia ma le aoga lea e aumai i totonu ma faamanuia ai tagata taitoatasi ma le atunuu atoa. O le uiga lena o lau tala. A faamanuia le Atua i le atunuu e manuia. O le mea foi lena o lea e fai atu ai...

SUI FOFOGA FETALAI: O lea la ua maua atu e le Maota ae faasee le saunoaga.

Afioga Hon FAUMUINA TIATIA FAAOLATANE LIUGA: O si ou uso ia Alaiasa, o le faifeau a le Worship Centre, e leai se mea e...o le mea o le tagata ola faamasino, o la e fai mai le Mataio e 7, aua e te faamasino atu ina ne i faamasinoina oe. E le faamasino le atalii ma le afafine o le Atua. Ou te le faamasinoina oe. Ia faamanuia le Atua ia te oe.

Afioga Alaiasa Muagututia Moefaauouo Malagaitutogiai Sepulona Moananu: Ia faamanuia foi le Atua ia te oe.

SUI FOFOGA FETALAI: Tatou faasee i le tatou galuega, lau Afioga i le sui mamalu.

Afioga FAUMUINA TIATIA FAAOLATANE LIUGA: Lau Afioga e pei o vaega ia o le turisi, e tataua ona ave sao i ai ni tupe i le paketi o lea o le a sau nei, po o le supplementary po o le main budget, e

fai ai auala ia o **historical sites**. Leaga a ave foi ia Papalii, e le lava loa le faasoaga faaoga i auala foi ia, o auala galue ma auala pupu. Ave sao lava le tupe ia Sala ma lana matagaluega e fai ai auala ia. Aua ou te fai atu o le mea lea e i Gataivai ma Sili, na pau foi lea o le itumalo e tautatala laau. O lea na ou faalogo i le isi sui fai mai, o le fau gagana o le fau lea e i Sili. E tautala mai ia oe, o le mea lena ou te fai atu ai. O lea na taua e le isi tagata taemanutavae, o le tamaloa Sili. Se i vaai i tagata o lou nuu ae tau fua e outou ae leai se tou feau i ai. Ave le tupe ia Sala e fai ai auala ia, historical sites. E aoga foi e faatino ai.....

SUI FOFOGA FETALAI: Malie le sui se i tutu atu le avanoa i le Minisita oTurisi.

Afioga Hon Sala Fata Pinati: Lau Afioga i le Fofoga Fetalai, ou te faamoia le saunoaga a Faumuina. O le vaegalea ou te matau i le faasolomaiga o saunoaga, o le \$300miliona lea. O le faasoaga la o seleni lea e sau ai le faasoaga a le Minisita o Tupe e saolele lava, a i ai se \$50miliona e aumai ia i matou ia o turisi e faalelei auala ma le tulaga lea, pe afai e tusa ai ma le saunoaga e \$300miliona, se e tupu uma lava mea uma. O auala uma o Savaii, ou te faia uma auala o Savaii i le seleni lea atoa ai foi ma faletalimalo, o lea e manaomia taligalu ma tulaga ia. Ou te fesoasoani ai i si ou uso o Papalii. Aua o le mea moni lava ia, e tele lava le manao ae ua utiuti le faasoaga ma le faaaloalo lava. Faafetai.

SUI FOFOGA FETALAI: Faaauau le saunoaga.

Afioga FAUMUINA TIATIA FAAOLATANE LIUGA : O lea ua uma ona avatu se sao o lenei itumalo o Palauli le Falefa. Si ou itumalo ua faamalo le tapuai. Tatou feiloaiga foi lea i le Kerisimasi ma le New Year, e toe faamanuia atu le tausaga fou. Taitai o ekalesia faafetai i la outou tatalo ma la outou tapuaiga. Ua manuia faiva ona o la outou talosaga. Lau Afioga i le Fofoga Fetalai, e avatu foi le faamalo i le Palemia ma le Kapeneta, Minisita lagolago, lenei foi itu o le Maota i ai manuia o le Atua ia i tatou uma. O lenei tausaga o le tausaga o manuia. O le suafa pele o Iesu ou te faatofa atu ai i lau Afioga ma lenei Maota.

SUI FOFOGA FETALAI: Malo saunoa i lau Afioga. E tasi lea tofa matua i le Maota, e pei ona saunoa o la foi ua faafofoga mai le itumalo, malo le onosai malo le tauatai. O le a tuu atu le avanoa e saunoa ai le Afioga i le Taitaifono o le Komiti o tupe.

Afioga ALIIMALEMANU ALOFA TUUAU (Taitaifono Komiti o Tupe): Faafetai mo le avanoaou tetulai atu ai ma le ava se i taumafai atu lava se sao o le itumalo o le Alataua i Sisifo i le Tala Faatatau Faaopoopo Nu 1 o le Tupe 2019/2020. E matau atu ua uma ona saunoa

le matou sui taitaifono. E le toe tau fai atu foi la se tala a le Taitaifono i le Tala o le Tupe faaopoopo o lea ua maea atu ona ia folasia. Ae muamua ona faapepei se matou tala, aua le afio o lau afioga i le Fofoga Fetalai, o lea foi e afio mai le afioga i le Taitai o le Malo le afioga i le Palemia, o lo o taimatalii i lenei Palemene. Le afioga i le Sui Palemia, le afioga i le Minisita o le Kapeneta Minisita lagolago. O lea foi e alala atusui usufono mamalu o sui o Komiti faa-Palemene o lea ua tuu mai i ai pe lafo mai i ai faatuatuaga o le Malo, e ala i le faatinoina o le matou matafaioi ia agaia le Malo, e ala lea i le mataituina o faatinoga a le Pulega a Malo.

Ua tatou faatasi foi ma Ofisa Sili o Pulega o Matagaluega ma Faalapotopotoga a le Malo, o le malosi o le Pulega a le malo faapea sui o le au faasalalau, ma le auuana nofo tuavae a le Palemene. O sa ia ma mamalu o le a toa ia i le maota o le Palemene.

Ae ou te faatalofa atu i si ou itumalo Alataua i 'sisifo, malo le folau. Ou te muamua na ou faamolemole atu i lena itu, aua nei faalavelave mai se isi sei uma lelei lava le lauga a le Alataua i Sisifo ona pule mai lea o outou. Lau afioga i le Fofoga Fetalai ma lenei Maota, a o le i tuuina atu se manaoga o le matou itumalo, se i fai muamua sa matou tala i le vaaiga lautele, i le soifuaga ua tatou i ai nei.

O Samoa o le atunuu ua faamanuiaina. E maumaututu le manatu lea o le matou lea o lo matou itumalo, mai le taimi na ou oo mai ai i le Palemene seia oo mai i lenei itula. Sa tele saunoaga ma faamaisega aemaise o le faafetaia a taitai o le Malo, o Ofisa Sili o Pulega, o le afioga i le Minisita, faalapotopotoga o le afaigaluega uma a le Malo, o Ofisa Sili o Pulega, aemaise lava le afaigaluega paia a le Atua. O e sa faanonomanu mo Samoa ina ia manuia ma ia saogalemu. O le lagona foi lea e tasi o lenei itumalo. Lau Afioga i le Fofoga Fetalai, a oo ina oo mai luitau o le olaga, ona faapea ane lea ua oo mai mala o le tatou olaga., ua oo mai mala o le tatou folauga. Ona tupu mai lea o le fesili, o ai e mafua ai? o ai o le a tuuaia, ou te manatu o tatou lava o taitai o le Malo e lafo mai i ai tuuaiga. Aisea? Aua tupu pea manao o le atunuu ma ona tagata, i mea e lelei ma le saogalemu, ia faapea foi ma le ola faatusatusa i isi atunuu o le lalolagi. Ae tele lava taimi e galo ai pea ia i tatou o Samoa o le atunuu faamanuiaina. Aua a tatou vaavaai i le televise i faalavelave tutupu i mala faale-natura ma faamai eseese o isi atunuu o le lalolagi. O le molimau ola lena o Samoa o le atunuu faamanuiaina. O nisi o nei atunuu e malolosi lava o latou tamaoaiga e faigofie lava ona toe atinae pe recover mai i ni o latou puapuaga faale-natura po o puapuaga foi faa-soifua maloloina, aua e malolosi o latou tamaoaiga. Ae a faatusatusa mai i si o tatou atunuu e maaleale lona tamaoaiga, e matua faigata lava ona toe tau atinae. Pe afai e tutupu ni puapuaga faapenei, e pei ona tatou matauina i faamai ma afa, i le toe tau fetuunaiga o mea e ave i ai le faamuamua a le Malo, ina ia aua lava nei nofo auuana taua masani, ae toe taumafai ni me a na faaleagaina. O i tonu lava lea e mafa ai lau tala o Samoa o le atunuu faamanuiaina.

Ma o le manatu maumaututu foi lena o lenei itumalo. A tatou vaai i televise i le tele o soifua maumau ona o mala faale-natura faapea foi ma le ola matelaina ona o le fiaaai, ona o faamai ona o mala faale-natura, o i tonu lava lea tatou te molimau ai i le vavega o le alofa tunoa o le Atua ia Samoa, e pei ona vave foi ona tatou toe foi i le olaga toafilemu, ua tatou i ai i lenei vaitau. Fai mai le upu e masani ona fai i le nuu lea o lou tama o Taga, ua fati magalo le ava a Salemuliaga. O lagona na o lenei sui usufono ina ua mavae atu ia faafitauli ia sa faafeagai ma i tatou.

O nei foi la vaaiga ma mea na tutupu, e aumai ai ma le feau taua, o le ola mataala ma le soifua magafagafa aemaise o tatou o taitai. E puipui si o tatou atunuu ina ia aua nei toe oo mai nei faamai ma aua foi nei oo mai le matelaina. Ona tatou te le iloa pe mafai ona tatou toe manumalo ai. E mafua ai ona fia faaalua se manatu pe le tatau ia ona tatou silasila i le faamautuina ma le faatupeina o se polokalae faamata, **quality parenting program**. Se polokalame faamata mo se tamaititi faatoa fanau mai seia oo i le 3 tausaga le matua, ao le i ulufale atu le tamaititi i le aoga amata. O lea e pei ona faataua mai e se tasi o saunoaga le ECE, e lagolago ai foi lea saunoaga. O lea polokalame e pei ona taumafai atu, ina ia aoao ai tina ma e vaaia fanau ma faafailele i auala talafeagai. O auala talafeagai ia o le puipui mai i mea e lamatia ai le ola ia saogalemu lona siosiomaga **physical danger**. Ia fafaga o meaai tatau ma le paleni, ia mama le siosiomaga e ola ai, ia fia tui puipui, ia aoao matua i gagana talafeagai mo nai tamaiti, le faaaloalo ma le mau uiga e aoaoina ai, ina ia tapue lelei le ola tuputupuae o fanau laiti. **Give them the best start in life**. Aua fai mai le upu, e aoao le tama ao itiiti, aua a oo ina matua, e le toe tea ese ai. O lea foi e matau i luga o nusipepa le aumai o faasalalauga i vaiaso uma ma aso uma mo ni fesoasoani i aiga e vaivai le tamaoiga. E matau atu ai mo ata e tapue mai, le vaapiapi aemaise le palapala o le siosiomaga. Ae pue mai ai ma nai tamaiti laiti i le toatele i se aiga i se fale laititi lava. O ituaiga polokalame ia e foia ai pe address ai ia ia foi faafitauli **quality parenting program**. Polokalae ia o lea e matau atu o lea ua amata ona faatino e le UNICEF. O le tiute lea o tatou o taitai o Samoa, o le silasila i ni auala, e puipui ai lo tatou atunuu, ina ai o gatasi foi ma taiala po o taunuuga manuia, po o moomia e pei ona i ai i le tatou taiala mo atinae. Le tatou taunuuga moomia lea o le Samoa maloloina ma soifua manuia, faapea foi ma le isi tatou taunuuga manuia ia siitia le atinae o nuu ma afioaga. Ou te talitonu o le taua foi lena o le toe tuu faatasi o auauna a le soifua maloloina, aua o lea o le a toe lalaga mai ai faapea foi komiti a tina. Ou te talitonu, e ui lava o lo o agai le faaautu a le Minisita o tupe, i le tulaga tau tupe i lenei tausaga faaletupe o lea e faaautu e faapea. Ia autasi le vaai taulai mo se manuia o Samoa. Ae ou te manatu o vaega uma ia o le soifua, autasi se vaai taulai mo se manuia o Samoa, e aofia ai ma le faamautu o se lumanai manuia ma filemu, ma saogalemu mo tupulaga o Samoa o fai mai i so o se tulaga moomia. O le tatou valaauina lea o taitai o Samoa, ia tapena ia

malosi ma malu ma saogalemu Samoa mo a taeao. O le aoga o lenei usugfono, o avanoa e maua i Tala Faatatau Faaopoopo o Tupe, o le toe tepa lea i tua i a tatou Tala Faatatau Autu, ma fua pe na a mai ia le faatinoina o galuega mo le tatou agai atu i le sini autu o le tamaoaiga.

O le taua foi lea o le toe faamanatu mai o le itu fefaatauagai, e siaki ai e le isi itu ia le isi itu. Faafetai malo le galulue i lau afioga i le Palemia ma le aiga Minisita faapea ia Minisita Lagolago. E matau atu i faiga faavae a tupe a le Malo, e pei ona aiaia i taiala mo le atinae o Samoa, o lo o sosolo lava, e le gata i a tatou tupe faatatau, ia ao tupe foi ua mafai ona faaalaina po o actuals i faiga faavae. O lea lava e matau atu o lo o i le 35% o le tamaoaiga le aofai o tupe faaalu ma o lo o matau atu foi ia le siitia o le tatou tamaoaiga i le 2.2miliona.

O le isi tulaga lea i le faatumauiina i lalo ifo o le 50% o le aofai o aitalafu ma nonogatupe, faafetai i lau afioga i le Minisita. O lea ua matau atu o lea ua i lalo o le 46% ia tatou aitalafu mai le tamaoaiga. O lea foi e matau atu i le faaalaina o vaegatupe mo a tatou totogi o tagata faigaluega, ia o lea lava e atagia mai ai le faataua e le Malo o le auaunaga, **service delivery**, o lea e faamuamua lava ia tatou ia le tele o le vaegatupe e faaalu mo tagata faigaluega e faataua ai le auaunaga a le Malo i so o se itu o manaomia ia aemaise le faaleleia o le tamaoaiga o le atunuu.

O le tele o isi faiga faavae ia e ono i ai, o lea lava e agai ina faaleleia atili atu, ma faaleleia i le mea e gata ai lo outou taumafai. Faafetai i le failautusi o le Tupe, faafetai i le afaigaluega aemaise foi ia le Minisita o lo o faauluulu i ai lea Matagaluega.

Ia a outou afioga i Minisita, o le aotelega lena i le matou vaai i ai i le tatou tamaoaiga ia faapea foi ia Tala o le Tupe, ia faapea Tala Faatatau o le Tupe. O lo o solosolo lelei ma manuia, e leai foi se mea e ala ai ona i ai ia ni faasea e na o le faafetai le mea e tataua ona avatu.

Ia lau afioga i le Minisita, se i avatu lava ia nai manaoga ia o si ou itumalo semeamanu e le i uma lou taimi. Faafetai mo le galuega e pei ona faataunuuina ai ia le tatalaga auala i lea vaiaso i Neiafu. Faafetai foi i le Pulega o Uafu ma Kamupani Vaa, i le matauina o le latou galuega fita i le tau faasoasoina o taavale e le gata i taimi o aso fiafia, ia aemaise foi ia le feoi ai i vaiaso uma ona ua siitia lava le aofai o tagata ma taavale o le matou motu. A lea e matau atu i lau saunoaga o lea o le a toe i ai le isi vaa faafetai pe afai o i ai se fuafuaga i le va o Savaii ma Upolu nei. Talosia ia oo mai le vaa lea e le i faia ia le palota.

A o ou manatua ai le palota i le taimi lenei, faamolemole lau afioga i le Minisita, pe mafai lava ona o fua uma tagata i le vaa i aso ia e 2 o le palota. E tusa lava pe le o o e palota aua tatou te leiloa pe faafefea ona **differentiate** ia le au o i le palota ma le au o i faalavelave. Ia o se manatu lena na ona amata atu ai ia se manaoga o Savaii semeamanu lea e le i taitai.

O lea sa taua e le afioga i le sui usufono a Salega lona auala o lea e i totonu o le Tala Faatatau o le Tupe 2017/2018, ae a e tagai i ai i le lisi

lena, aua sa masani ona fai mai ia galuega faatino a le Matagaluega, le LTA, sa lisi mai i lalo ia igoa o afioaga o le a fai, o lea la e lona 4 mai ai ia Falelima, ae e lona 6 mai ai ia Samata. Na ou alu foi au faasino i lo matou itumalo, o la ua i ai ia le igoa o Falelima i le lisi o auala o le a faia. O le nuu lea o Falelima, ou te talitonu e aoga i ai isi saunoaga ia sa ou faalogo atu i ai i le **Climate Fund**. Ua manaomia ia le **relocate** agai i uta, ona ua tele ina aia le pito i tai o le auala ona ua leai ia ni isi e nonofo i le pito i tai ona o le sami. E aoga tonu lava i ai ia fund ia aua o le o le relocation agai i uta i le auala galue ia si afioaga lea.

Ia lau afioga i le Minisita o Aoga, a e matauina e tasi lava lou manaoga na i ai talu ona ou oo mai, o le faleaoga o lo matou itumalo, ia leaga o lea e le i afio mai ia le sui usufono o Falealupo, ae o matou ma Falealupo lea e i ai le faleaoga lea sa tuitui atu pea, tuitui atu pea, tuitui atu pea. A e tagatagai i le vaiaso na tea nei i le tatalaina o le faleaoga o Fagasa, o i ina tonu lava e afa i ai ia le alu atu i Neiafu agai i o i le itu Asau, le mea lea e tu ai le faleaoga. Ou te leiloa po o ai le poto lea na avea tuu lava i o ia le faleaoga i o. Sa sili ai ona ave e tu i o i Aopo.

Ia e feoloolo la Neiafu ae o le isi nuu o lou itumalo lea o Falelima, e 30 minute ou te alu atu ai i nei i le uafu. Ae a ou sau mai Neiafu ou te alu i le faleaoga i o i Asau, e 35 minute. O lona uiga, a o mai ia tamaiti Falelima, e 40 minute. Ia o le mamao lena lau afioga i le Minisita, e tausavali ai nai tamaiti uma i o i le matou faleaoga lea o le matou itumalo lea e i o i Asau. Faamolemole se i tagai ane, o lea e matau atu o lea e... lau afioga i le Minisita semeamanu o lena e te lua see lua faatasi mai i ina, o lea ua alu i lalo ia tatou aitalafu. O lea ua 46 o lena e lava le 4% lena se i toe fai mai ni isi a tatou loans se i fai ai ia matou faleaoga uma o a matou itumalo.

O le isi mataupu lau afioga i le Minisita o Aoga, sa taua le tele e tuua e faiaoga ia aoga ae o e tala ia totogi, e sao lelei e lavea ai foi ma le matou itumalo. E talosaga atu pe le mafai ona talosaga i faletupe, e faatutu ia ni nai ATM machines i ina i le itu Asau leaga e tasi lava ia le Bank lena e i ai e na o le Bank a le Samoa Commercial Bank. Ae o le tele o faiaoga ou te matauina e o que up i le ANZ. Ae talosaga atu ai ou te iloa pe faigofie pe a talosaga atu i lau afioga, ia ni nai masini na tala tupe ia, e foia ai le o i Salelologa e tala totogi i Aso Lulu uma.

Lau afioga i le Minisita o Fesootaiga, ia faafetai, e i ai nai aiga e toatolu o le matou nuu la ua ola le Digital TV. Faafetai i lea auaunaga ou te talitonu lava, e oo atu i le afa o le tausaga ia ua oo atu i o i le matou itumalo ia le faasopoliaina ia le itumalo atoa. O le manino ia ma manaia o le TV i o i le matou faaitu faatoa... i le taaloga lakapi lea na tea nei, aua o lea faatoa ola ai i ina ia aiga ia e toatolu, se e pei ua toe vaai i aso la e tumutumu fafo ma totonu o nai aiga ia e i ai ia TV, i le matamata ai o nai tupulaga ia ma nai toeaia o le nuu. Faafetai talosia ia uma ae le tausaga, ua faasopolia uma atu ia lea auaunaga.

Ia lau afioga i le Fofoga Fetalai, faafetai lava mo faasiligamalosia o lenei afiafi ma faguvai. A lea ua ou faalogologo atu i lenei afiafi i le

manaia o le vai lea e tau o le Kangen water ea, e manaia ae aumai ai ia ni tatou faguvai faapea a le tatou Palemene, ia i taimi e fai ai ia tatou fonotaga. Ia ona i ai lea o le taofi, ia ua taoto atu ia se lafo vale o lenei itumalo.

O le a foi le leo o Alataua i Sisifo, se a se upu ua le taugamalie i le faafofogaaga, tofa malie ma uta malie. Alofagia e le Atua ia maua pea le malosi, maua foi le tofa aua le faatautaiga o le Maota o Samoa. Agalelei le Atua i lau afioga i le Palemia, i le afioga i le Sui Palemia, ia faapea ia afioga i Minisita o le Kapeneta, faapea foi Minisita Lagolago. Maua foi se malosi i lenei itu o le Maota, faapea sui o Matagaluega ma Faalapiotopotoga, auaunaga eseese o lo o tatou mafuta i lenei itula o le afiafi. Ia folau i lagima le sa o Samoa, si ou itumalo o Alataua i Sisifo, o lea faatoa ou fia manusina lava lenei, ina ua tea ia peau lagalaga o le vasa, i lena 4 tausaga ua tuanai. O le a se vaivai, ia tofa malie ma uta malie. Agalelei le Atua i le tatou itumalo, ia faamuli ai le faafetai i le Susuga i le Failautusi ma le Ofisa o lo o tautuaina le Palemene, ia soifua ma ia manuia.

SUI FOFOGA FETALAI: Malo faafetai, ia o lea ua faafofoga le Maota i le saunoaga matagofie i lau afioga i le Taitaifono o le Komiti o Tupe, e momoli ai le faamalo ma le faafetai galulue, malo le tauatai, i lo outou faiva sa feagai ai ma lo outou galuega.

Manatu o lea ua faaifo i fanua le faatamasoaliiga e ala i saunoaga faalauaitetele a sui usufono uma o le Maota e ala i le Tala Faatatau Faaopopo Nu.1 o le Tupe 2019/2020. Manatu lea o le avanoa lelei e tuuina atu i le afioga i le Taitai o le Malo, mo sana saunoaga, ia ona amata ai lea ona tali ia le aiga Minisita o le Kapeneta i ni mataupu sa laga i saunoaga a sui usufono uma. Tapa lau afioga i le Palemia.

Susuga Hon TUILAEP AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI: Lau Afioga i le Fofoga Fetalai, ou te tulai atu ma le agaga faaaloalo, e momoli atu le faamalo i sui usufono uma lava o le Maota ua sausaunoa i le tatou Tala Faaopopo o le Tupe. Faamalo foi i le faatupu manatu i le Kapeneta, tele mataupu ua laga, ia ma o le a lagolago foi i fuafuaga alu i luma a lo tatou Malo.

Ae ou te le i oo atu i le Tala o le Tupe se i fai atu lava sina tala i le vai lea o le Kangen water. O le vai lea, e na o le pau lava le mea lea e taua i le vai, e **alkaline**. O lona uiga o le alkaline water e mafai ona faavaivaiina ia le **acid** i totonu o tatou tino e ona, ona e maua mai i le taumafa povi ma manu fasi. Ia o le galuega la a le alkaline water, e na te faavaivaiina ia le ona lea e i totonu o le tino. E pau lava lena o le mea e fai e le vai, ae gaosi mai le vai lea i le masini. O le mea e taua o le vai lea, a e ala mai i le taeao, e inu ni au ipuvai se 2, i totonu o le 60sekone, ua mafai ona ia aveeseina uma lava le ona lea i totonu o le tino. Ae a i ai ni au fualaau e inu, faatali laia se i.... a uma ona inu ona faatali lea

seia atoa le afa itula, ona faatoa inu lea. O le mea lenei o fualaau, e i ai fualaau pe 6 itula pe 4 itula pe 8 itula faatoa inu se isi fualaau. E ala la ona 4, 6, 8 itula ona o fualaau e tuutuualie mai le vai lenei e i ai e fofou lou gasegase. O le mea lenei e faatali se i uma le 30 minute, ona faatoa e inuina loa lea o le vai lea, leaga e inu loa le vai lea i totonu o le 60sekone, o taamilo i le tino atoa ma liusuvai atu ai uma ma fualaau ma le aoga ai. E taua la, pau lava lenei o le mea a le vai lea e fai. E mafai foi ona e ausia le tulaga lenei o le docs o lona uiga ua le aveesea le ona e mafai foi ona e mauaina mai le inu o sau vai tipolo. E alkaline foi le tipolo, ae o le faalavelave o le tau tigaina e te alu... e tele le galuega e tau tipi le tipolo oomi, a o le vai lea, na ona e alu atu lava ki mai inu loa i totonu o container e aumai ai. Ae le fofou ai ni misela. O le ala lenei o lea na sese ai le mataupu a le alii lea. E le mafai e le vai lea ona taofia le niuonia.

Lau Afioga i le Fofoga Fetala'i, lea se i faatea ese le mea lea, ona faatoa amata ai lea o lau lauga.

E i ai le fusuga e masani ona ou faia le tala lea, o lea e taumate po o le tausaga e 1960 a o i ai le Tivoli. O le tama Apia ma le tama mai tua, o le paga faaiua lea e iu i ai fusuaga. Alu le taamilosaga muamua, o le taimi lenei e i ai iviivi i luga ua tumu ua le ofi tagata, ona o le paga faaiua lea. O le mea lenei a i ai loa se paga faapea e tumu e oo lava i Savaii e omai e matamata. Manaia ae taufai tutusa oo loa i le paga faaiua, ua afa le taamilosaga mao loa le tui a le tama tua taatu le tama Apia, faitau upu ae ua sau le palapala. Alalaga atu loa "Tu i luga, tu i luga." O le faalototele atu lenei a tagata. Ia tu loa i luga si tama ua faalogo i le vaega lea. Na ona mei lava o le tama tua, tui tau lava i le itu toe taatia ae o lea ua sau lava le palapala. Toe valaau mai tagata, "Tu i luga, tu i luga" ona tu faamalosi ae ai lava si tama i luga. Na ona tu ae lava i luga right cross e le tama tua toe taatia ae ua atili ai ona sau le palapala. Toe valaau mai loa ma tagata, "Tu i luga." Tu ae loa i luga, tilotilo atu, alu loa ma le laulauvavale tele lava. "Faapea, tou te vaai mai lava i ou gutu ua toto ae..." O le lesona o le tala, e ese mamao lava lou taalo mai tua ma lou taalo i totonu. A taalo mai tua o le tele ia o mafaufauga, ae sau loa i totonu, ese mamao lava le mea lea e fai i totonu.

O le tatou Tala o le Tupe lea tatou te pisi ai nei, e laititi lava. Na o le \$23,800,000 si tamai tala lava o le tupe o lo o faaigoaina o le tala faaopoopo. E faaopoopo atu i le Tala Autu lea la e... O le Tala Autu tatou te pasia i le masina o Iuni. O le tausaga faaletupe ia Iulai tau ia Iuni i le tausaga fou. O lona uiga la, o lea ua faataoto mai uma atinae ma galuega e fai se i tau ia Iuni i le tausaga fou. O le mea lea ua naunau ai le Malo e toe faaopoopo le \$23,600,000 o isi foi galuega fou e faaopoopo. E faaauau ai lea o le tatou galuega se i tau lava ia Iuni o le tausaga fou. O suiga lea na fai mai i le tausaga 1989 a o ou Minisita o Tupe i le taimi lenei, ina ia tau ogatasi tatou tausaga faaletupe ma tausaga faaletupe a tatou paaga mai fafo, ina ia faigofie ai a tatou budgeting, sau sao lava fesoasoani ia mai fafo faatasi i le taimi a tatou.

O le tausaga faaletupe na sau ai tatou, mai le 1962-1989 o calender year mai ia Ianuari se i tau mai ia Tesema. O lea la ua suia nei mai le aso 1 o Iulai faaiuga o Iuni. O le tulaga lena o lea e mafua ai ona e oo mai i le taimi lenei ua i ai ia galuega fou ua moomia e le Malo. O uiga na o mea nei o fuafuaga mamao. O le itupa lea o le au economist o i latou ia e fuafuaina le tamaoaiga. O le mea e masani ona manao i latou e fai, ia tasi le paketi, aua ne i i ai le faaopoopo faavaivaa. O le vaivaiga lena e le i i ai lava se taimi ua tasi ai se paketi ona e i ai lava mea e tutupu. O se fuafuaga lenei e faia e le tagata o tupe e ono maua. A oo loa i le faasologa o le tausaga, e masani lava ona eseese le tulaga o le tupe e maua mai, pe sili pe pau foi i tua. O le faamoemoe lena i le lelei o gaoioiga a Matagaluega e lua, o le Matagaluega o le Tiute ma le Matagaluega o Lafoga, ma seleni foi mai fafo, aumai i le afu o le au totogi lafoga a isi foi atunuu, lea tatou te fai paaga. A tuufaatasi la le tamai tala faaopoopo lea ua lua po o tatou pisivale ai ma le tupe lea ua uma ona faataoto mai i le Tala Autu ona maua ai lea o le aofaiga atoa e \$848miliona e le i oo tatou i se piliona. E \$848miliona le paketi atoa po o tupe atoa lena autu. O lea e faagasolo ai nei le tatou Malo. O fuafuaga la masani a le tatou Malo mai lava i le amataga. I le tulaga o le fuafua tatau i tupe o le atunuu. Ia taumafai lava le Malo, muamua ia totogi ni aitalafu. Lua, ia lava se tupe e faagaoioi ai le Malo, o le mea lena e fua i ai tatou e a tatou paaga ma faalapopotoga mai fafo, po o lelei ona fuafua a tatou tupe. Manatua la, o le tele o tupe ia e aumai fafo i paaga. O le isi vaega e sau faafoai, a o le isi vaega e sau i le tulaga o nogatupe mama. O mea la e lua lea e faataoto mai e le Matagaluega o Tupe, Minisita. Ua ausia le mea muamua, ua lava tupe faaagaaga e totogi ai nonogatupe ma le lua ia lava le seleni e faatino e faagaoioia ai le Malo, current expenditure. Ao le agaga soo se malo ia lelei faafoe e i ai sina mea e ova mo le atina. Aisea? O le atinae lea e tupu ai galuega, tupu ai le economy. E leai lava se seleni e ova atu i luga a tatou lav ia e faatino ai le tatou atinae. O le ova la leea e i ai e \$80miliona. E tusa u auma ona totogi aitalafu, uma ona faataatia le seleni e faagaoioia ai le Malo. ova ai loa le \$80 e faatino ai a tatou atinae. Faamalo i le Minisita o Tupe le mataalia. O i lea e fuafua mai i ai le vaai a paaga. Ona tatou tilotilo loa lea i atinae, o le a la le atinae lea e i ai, e le \$80miliona ae \$117milion, o lona uiga ua ova mamao atu, le atinae lea e fatino e tatou. O luga atu o le \$80miliona. A tilotilo i le pepa na e avatu ai le faapuupuuga o \$140miliona, lea e faatupe ai atinae ua uma ona talanoa e sau faameaalofa, ua uma ona talanoa ma tatou paaga.

O le isi vaega e \$26miliona, o le vaega lena, o lea e faatupe mai i tatou nonogatupe e mama tului. O le ata atoa lena o le tatou Tala o le tupe lea e faagaoioi ai nei, ia le tamaoaiga ua uma ona fuafua e le Minisita lea poloketi ma lea poloketi, e faalu ai seleni nei. A i ai la ni mea ua faagasolo e oso faalava mai, e le mafai ona faatupea ona o lea ua pasia le tala o le tupe, ao mea uma e tatau ona...tupe uma e sau i totonu, e alu ifo i le Ofisa o le Tupe faasau ai loa i le Palemene, pasia ai e fafo. A i ai

la ni mea e uma nei le tatou Fono ae oso faalava mai, o le a le tulaga e iai? Aua o lea ua uma ona fuafua mea e faaalu ai tupe. Ona faaoga loa lea o le Pule lea ua tuu mai e le faavae, e mafai ai ona faaoga...aapa loa i ai le Malo e faaoga e pei o mea ia, o faalavelave tutupu faafuasei. Ae faatoa aumai mulimuli ai lea i le Palemene, ma aumai ai ma seleni e faatupe ai, pei la o le misela le na faaoga loa le malosi lena o le malosi lena o le Malo. Ae faatoa aumai mulimuli fesoasoani uma mai fafo ona faapaleni ai loa lea o mea ia.

Lau Afioga i le Fofoga Fetalai, ua ala ona ou taua mea ia, ona o lau tu matau pe i e faasalalau solo le debate lea na sau nei. E tattau ona aumai lea, e tatau ona aumai le a? E le faapena ona fai ni mea, ona o lenei a aumai tupe mai fafo, e sau tonu lav i le mea e agai i ai, e pei lava ona i ai faatalanoaga ma tatou paaga. Mo sina faataitaiga, o le fale lea na fai nei. Ua ou le iloa pe lima ea tausaga o fai le Maota lea o Faamasinoga. O lona uiga la, a aumai le tupe e uma lava le tausaga o faasolosolo ai lava seia oo ina uma. Ae o lea ua aumai mai fafo. A i ai la se tupe e totoe, e le mafai ona aumai e ave e fai ai se isi mea. E noatia lav i le poloketi na aumai e faatatau i ai, e pei ona saini ai lo tatou Malo ma malo mai fafo. O le mea lena e le mafai ona sese le faaogaina, e aumai le isi mea e faaoga ai l eisi mea. Ao Faalapotopotoga nei mai fafo, e fai ma o mai a latou savali e siaki, lea na aumai ai missions. O faalapotopotoga uma lava e o mai missions ma faatalanoa ma siaki po o faaoga sao tupe ia. O le ala lena e maua ai pea le vaai mai a Malo mai fafo ia Samoa ona o lo o mulimuli i principles of good governance. O taiala nei o faigamalo lelei. O a la taiala na? Accountability. O a mea uma e faaalu, ia iloa o la e alu sao lava i mea na fuafua i ai. O le ala lena e taua ai le fai o lipoti. O le upu foi lena a le Kapeneta e ave i Ofisa Sili o Pulega, vave ona fai lipoti ma ave i le Palemene, ina ia silafia e taitai o le atunuu mea o lo o agai i ai seleni. O le principle po o le Tulafono lona lua o le transparency ia manino mea uma aua nei i ai ni mea faaalatua. A i ai lava la ni mea manino e maua i ina i le okika. O le ala foi la lena e faamalosi ai, o isi atunuu e faavaivai lava le okika. E pei lava e ova i le 20 ma ona tupu tagata ia e galulue nei i le Ofisa o le Okika. A o lo o faatumutumu ai le okika e masters, Bachelor, Masters, e member i le asosi a Niu Sila, masalo o le okika aupito sili lea ona high qualified, ever, ua na hold ina le position lea, e lipoti sao mai foi i inei ina ia faatino ai le independent o le audit office. Ae a i ai ni mea faaletonu, o lea foi ua i ai le ofisa o le Ombudsman, na pau lava lenei o le Malo foi lele i le tele o Malo, e le gata ina matua malosi lava le ofisa o le okika ae malosi foi le faamalosi le Ombudsman office e toe suesuea le Malo, e suesue faaiuga e faaletonu.

Lau Afioga i le Fofoga Fetalai, ou te lagona o mea ia e tatau ona malamalma i ai le tatou Palemene, masalo ua ova i le 80 po o le 85 fonotaga faa-Palemene o mea nei o Tala o Tupe talu ona ou sau i totonu o le Palemene lenei. O nisi o tausaga e lua Tala o le Tupe. O nisi o tausaga aemaise lava le amataga mai ua tolu Tala Faaopoopo o le Tupe.

Ma ou faalogo ai pea i le ituaiga debate lea e alu nei e alu ma alu ma alu. E pei se record foi lele, ta ma toe ta ma toe ta, aua o mea lava ia e faataua e tatou uma, faataua o tatou auala galue, faataua mea nei o le vai, o mea tetele lava ia e lua. A o le faatulagaga o mea o atinae a le atunuu, so o se atinae i so o se atunuu, ia paleni mea tetele ia e lua. O a mea ia e lua? Ia paleni le economic development ma le social development. O lea le uiga o ia mea? Ia paleni atinae autu e faalagolago i ai isi atinae. E pei o le a? E pei o auala, auala galue, uafu. Ia paleni lelei ma social development aua le soifua lelei o o tatou tagata. O a la social development? O aoaoga faapea foi ma le soifua maloloina. O mea la ia e prioritise e le Malo. E le na o le tasi se mea e prioritise e le Malo, e vaai lelei le Malo i le vaaiga lautele, vaaiga aoao, e le faapea na o auala e fai. E le faapea foi na o vai e fai. E lautele. Ma e le o taitai lava le tupe lea e maua e le Malo e faatino uma ai lava galuega nei tatou te moomia ona e le mafai ona ausia e le Malo mea uma ia tatou te mananao i ai. O le ala lena o lea e promote. O lona uiga o lea e uunaia ai e le tatou Malo ana paaga ma faalapotopotoga ina ia omai i Samoa nei ma faatu o latou ofisa i totonu o Samoa ina ia fesoasoani mai i lo tatou le tagolima. Aua o le mea moni lava e le taitai lava a tatou tupe, ona o tupe uma nei mai fafo e noatia i luga o feagaiga osi e le mafai ai ona tatou soona faaoga seleni e aumai. O le mea la lena lea e i ai le JICA. Faafetai ai i isi faalapotopotoga, ADRA, faafetai i isi faalapotopotoga, o faalapotopotoga nei o paaga nei a le Malo, e omai e fesoasoani ia i tatou. E i ai foi ma isi fesoasoani mai le Malo o Saina tuusao e ese ai ma mea e auala mai i le tatou Malo, le EU. I le faamoemoe o le Malo, a le lava mea e fuafua atu i totonu o le tatou Palemene lenei, tasi lena vaega tatou te tua i ai, aua tatou te nofonofo ae o sao lava tatou i tua, o i ai i talosaga e fesoasoani mai. O lona uiga, a alu atu le mea i le JICA ona e nofo lea ma faitau ane, tasi lena vaega o le tatou Paleaiga lenei. Faaopoopo loa i ai ma le anoano o mea ia e fai nei, lea e uma a isi ua lauga mai mea ia ae ua le lauga i mea e pitoa lava i lona itumalo, o mea na e fai e le Kapeneta.

O le tausaga e 2006 na tutu mai ai le taitai o le SNDP lea ua maliu, na tutu mai ai i le nofoa le la ma fai mai lana upu lenei, lau Afioga i le Palemia, ae a pe a e malie ma lau vaega, se ua tele tele nei mea ma ua televave tele nei mea tou te faia. Ua leva foi ona matou fia o atu i ina. Ae a pe a faapea, taofiofi nisi mea, faateletelegese le tou o se i oo i se faiga palota ona matou see atu foi lea o matou matou te fia saofafai i le mea lena tou te saofafai mai ai. Lau Afioga i le Fofoga Fetalai, ia ona ou tu loa lea, ua lelei, o lea ua faalogologo atu le Kapeneta ma lau vaega. Ia ona ou liliu loa lea ou fautua i le Kapeneta ma le HRPP, back benches. Ma ou faapea atu, o lea ua outou faafogafoga i le augani a le Itu Agai, fai mai e faatelegese, fai mai, aua le soona faia. A o lau la fautuaga ia outou, o le tou malosilava lava o totoe ai pe faafaina pe faalimaina ona saosaoa ia matua alu i le saosaoa e gata mai ai. O le tulaga lena o galuega o lo o faatino e le Vaega lenei. O le mea lena e ala

ai ona tutulai le Kapeneta e le talitonu e nofonofu i totonu o kesi ma faalue ae tutulai ma o. Pei foi ona ou taua analeila le asiasiga na o ai Minisita e o e taamilo e o i isi i Savaii ae o isi i Upolu nei, taamilo ma tilotilo ia i latou o tiga ina ia tiga faatasi ai latou na gasegase i le misela. O le ala foi lena e ala ai a maea galuega, e masii le Malo faapena foi ma i latou o Ofisa Sili o Pulega matou te o matou te vaavaai pe na lelei ona fai le galuega, matou te o e tapuai faatasi ma le faifeau e momoli le faafetai i le Atua, o ia na amatamea i mafaufauga o ia foi na faaiumea i le faaiuga o le galuega ua lelei faatino. O le ala lena e le nofonofu le Malo. Ma o au ma lau Kapeneta ma le HRPP atoa, e taua galuega i lo upu folafola. O le mea lea, ia faataua e i tatou uma galuega ua tatou faia, aua tatou te nonofo ma pei e tau faifai i galuega sa tatou faia ma pei e lafolafo foi lele e tuu i lalo le faataua. Aisea? E alu ifo ai ma lou mamalu e tou itumalo aua o la e foi e matau. Aua ne i o tatou manatu mama i o tatou itumalo, o isi foi tagata faipolokiki. O le manatu o le tele o tagata mai fafo, o le Samoa, e fanau loa le Samoa polokiki loa. Aua tatou te manatu mama i a tatou saunoaga e fai i totonu o le Maota lena ma taumama galuega sa faatino i lou itumalo aua e mau e faalele ae i ai foi e matau.

O le upu lea sa ou faalogo i ai i le mataupu lea o le one party state, e le o se mea lelei, a o se upu e faifai ai i le faigamalo lena e tasi le Vaega Faaupufai aloaia. Lau Afioga i le Fofoga fetalai, o le mea lea o le tasi o le pati i se atunuu e faamalosi e i latou e faia le Malo, o mea na e tutupu i atunuu e pulea faavaegaau, pulea faamalosi. O lona uiga e le lelei i le vaai a le atunuu. Ae a filifili loa e le atunuu se vaega i le filifiliga saoloto a le atunuu ona tasi ai loa lea o le vaega, e le o se mea leaga. Aisea? Aua foi o le finagalo lena o le atunuu, e tatou te faia le mea o i ai le finagalo o Samoa, ae le pule ai tatou. O le ala lena ou te manatu ai ma le alofa ia i latou e lafoa soo le upu lea, e foliga mai ai e matua le malamalama i polokiki a Samoa. Ae i ai le Tulafono taua lava ina ua uma mai le faiga palota, ona fonu lea o le Vaega Faaupufai lena, felafolafoai ai ma tasi ai le finagalo o le Vaega Faaupufai lena, e tatau ona tilotilo le vaega i le tulaga ina ia faatino ai pea uiga ma aga faapalemene e le tatau ona pulea e le Malo uma i tulaga o le faigamalo galuega faapalemene. Ona tofia ai lea o le Komiti ona omai lea ma le latou fautuaga e faapea, o le a see ese le vaega lena mai le tulaga masani, e tofi loa le Kapeneta, le Palemia ma ana Minisita e 13, o tagata uma lava e le Minisita, e omai uma lava e Minisita Lagolago. O se faiga o le a foliga mai ai o le a le mafai ona i ai ni check and balance, o ni tagata e tutu mai ma talanoa mai e tau taofiofi le saosaoa o le Malo. Ona tupu ane ai lea o le manatu, o latou lea o le a tofi e le avea ma Minisita Lagolago, o le a outou o tou te agaia mai le tatou Malo. O le Itu Agai lava a le Malo ia. Ae leai ni tou taavale tou te feoai ai pei o Minisita Lagolago, e leai ni telefoni ma tulaga uma faapena. O le faaiuga lau Afioga i le Fofoga Fetalai na tei ai le au atamamai mai Ausetalia ua tetei ina ua omai e fai le latou semina ae faalogo mai e ese

le ituaiga temokarasi lea e fai iinei, o lo o aloaia ai le Tulafono o pulega malo e faapea Tulafono o pulega malo. A e tuua le power i se tagata e toatasi po o ni nai tagata, o le natura lea o le soifua o le faaaogasese loa. O mea ia na faavae ai le faaiuga a le Vaega lenei, ina ne i te i ua faaaogasese le pule ona ua atoa i i toetiiti atoa i i le Palemene, o i ina na tupu mai ai lagona o le pati, o le a o atu loa isi e nonofo mai i ina e leai ni latou faamanuiaga e maua, ma ou te lagona o se osigataulaga taua tele lea mo le atunuu. O le ala lena o lea e ala ai ona vaevae le pule ma le power i vaega e tolu o le tafatolu, ave le fasi pule i o i le tafatolu o le faamasinoga, ave le fasi pule i o i le pulega malo o lo o faaauluulu i ai au ma le kapeneta faapea foi ma le aufaigaluega atoa a le Malo ae aumai le isi fasipule i le Palemene. O le a se faaletonu, ona check mai lea e le isi power le isi power ma ia taofiofi ai le teletelevave. O le tulaga lena e mafua mai i le manatu lenei power corrupts, absolute power corrupts absolutely. Ma o le mea e tatau ona fai i ai, e tatau loa ona i ai se system of checks and balances. O le system lena e base atoa ai lava le Malo, le constitution a le Malo o Amerika ma malo uma faatemokarasi e vaetolu le pule ae muamua atu a o pulea Malo e aiga tupu, e tasi lava e i ai le poweria e tolu, na o le tupu lava pe na o le taitai foi o se vaegaau e i ai uma lava pule ia e tolu.

Lau Afioga i le Fofoga Fetalai, o le ala lena o lea e... afai e matau mai i le fetogiaiga o taofi e le o i ai, e taua lava le finagalo lea na saunoa i ai le sui usufono o Anoamaa Sasae i le mea lea o le collusion. O lea la a matau mai e leai se collusion o i totonu o le Palemene lenei. O lea a o faafogafoga mai le atunuu, e fetu'iai lava i taimi uma, ma o se uiga taua tele lena e tau atu ai o lo o ola le temokarasi i totonu o Samoa.

Lau Afioga i le Fofoga Fetalai, o le faatulagaga o tatou galuega, pei na ona ou faamataasi ona amata loa lea o le matou galuega o la e tele le taimi, e amata mai o ona faasolo mai ai lea, o ni nai vovoga o totoe ona ou faamamaina lea i le faaiuga ma tatou see atu ai loa e auiliili le Tala Faatatau Faaopopo o Tupe. Ia manuia tele le faafogafoga mai a le tatou Maota i le upu tomua o le matou galuega, ua leva ona tautulemomoe le Kapeneta, ua leva ona fia tutu atu e tali atu mataupu sa outou mananao i ai. Ia manuia le tatou felafolafoaiga i lenei afiafi.

Susuga Hon Laauli Polataivao Leuatea: Lau Afioga i le Fofoga Fetalai pe maua se avanoa...

SUI FOFOGA FETALAI: Ia, le sui usufono mamalu, e lelei ona faamanino po o le a se tulaga o fia saunoa ai.

Susuga Hon Laauli Polataivao Leuatea: Sa ta musu lava e faalavelaveina le faamalamalamaga a le Afioga i le Palemia, e manino ma e manatu foi ua atoatoa, leaga o lea sa na taua le mea sa ou taua i lau lauga. Na o sina mea laitiiti lava ina ia ou faamanino atili. O le upu lea na ou taua i lau folasaga sa fai, o le tatou Paeaiga lenei o le Paeaiga

tulaga ese ona o le filifiliga a Samoa. O le mea lena e tataua ona faamanino. O le tulai mai o le tasi o le vaega faaupufai i totonu o le Maota Fono, o le filifiliga a le atunuu, one party state. Ma e le mafai ona tatou alo i le mea lena, ua tasi le pati o tauavea le Malo. A o le agaga lea na ou mana'o e faamanino leaga o lea e mau i faamaumauga lau folasaga na fai, o le filifiliga a le atunuu. O le agaga lena, e le o se itu alualua po o se itu faaletonu na ala ai ona ou taumafai atu.

SUI FOFOGA FETALAI: Malie le sui usufono se i saunoa le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afioa i le Fofoga Fetalai, ou te le i agai atu e auiliili le mataupu, faatoa ou auiliiliina i le faaiuga pe a oo mai ia te au, o lea la faatoa auiliili. A o au upu tomua lea sa ou talanoa atu ai ai. Ae taua tele lou tulai mai, leaga e i ai isi tala o le a toe faaiu atu ai lau fagogo lea e fai atu. O tala atu ananafi na ou alu ifo ai e fai sau upu i le au lakapi taitoafitu, na i ai uma lava ma tatou au ia ua sauni atu i le taamilosaga lea e fai i Fiti. Sa i ai faiaoga uma lava ona ou fautuaina lea, o au lea... o tatou lea ua saofafai i totonu o le fonotaga a le komiti tele po o le fono sili e pulea lakapi a le lalolagi. I le felafolafoaiga o taofi o i ina lea faatoa ou maua mai ai le tulaga lea ua i ai lakapi a le lalolagi ua ese mamao lava ma le tulaga lea sa ave ai o ni taaloga e tataua ona tafafao i ai, a o lea ua suia mai talu mai lava le tausaga e 1997 ua sui atoa ai taaloga a le lalolagi ua ave nei o ni taaloga totogi, profession. I le taimi lena ua le toe gafatia e tatou ona toe faaauau. Ou te to lou pulou i le toeaina lea na tauavea le au ia Laauli, totogi uma lava e ia, tauave e ia le taugata o nei taaloga. Ae ina ua le mafai ona tauave e Laauli ona nonofo ai loa le o le komiti i le taimi lena faatau le Manu Samoa, faatau motu lava ua le toe i ai se tatou aia i ai. O le taimi lena o lea e taalo ai Brian. Na ave la i le au milionea e toalua o Fay and Richwhite, o milionea ia e toalua na la ave ua pule ai. Ae pei na ona tau lava foi lele o lea e i lalo o le Rugby Union ae matua leai lava ma se pisinisi a le Iuni Lakapi o toe i ai. Ae talu ai la o au sa peresetene mai le au lakapi a le Apia West, na mafai ai ona ou offi mai totonu ma ou saofai loa i totonu o le pulega lakapi. Lea la na ou agai atu ai loa i luga ina ua faamavae si toeaina o Laauli ua amata ona gasegase, lea la na amata ai loa lea ona fai a matou feutanaiga ma Sir Michael and Fay Richwhite toe faafoi mai le au a le atunuu. Ae te i la ua aliali mai ai, a toe faafoi mai e i ai le tau. O le 2003, 2004 lea na toe faafoi mai ai le tatou Manu Samoa Taitoafitu. Toeitiiti lava a fai e Sir Michael and Fay Richwhite le faiga matavale o le aveese mai o le tatou taitoafitu mai le lakapi a le lalolagi ona o le mumusu e toe faaalu ai le tupe na o le gau gau gau ai i mea ia o lakapi. Ia, o au la na matou talanoa ma ou fai i ai, e leai se lua pule e te lua aveesea ai o le au lea o le au a Samoa, afai ua tou le mafai ona faia,

malie e toe faafoi mai, o lea la na amata ai loa lea ona toe foi mai tauave e tatou, mulimuli ane i luga o matou feutanaiga na toe foi mai ai ma le Manu Samoa ae totogi, e totogi latalata i le miliona. E toe totogi o le aitalafu lena e toe faatau mai le Manu Samoa ae totogi la auauai i le tusi o le latou igoa i le jersey, pei la o ina le isi auala sa togitogi ai. Masalo po o le lima po o le ono tausaga talu ai faatoa pulea ai loa e Samoa lana au. O letulaga la lea ua ofi atu tatou, ona ou alu atu loa lea ou faalogologo ma ou tilotilo atu i le mea lea ua i ai le lakapi a le lalolagi, o lea e alu tatou i le mea tuai a ua see ese le lalolagi ua faatau le puipuiga o tama taaalo. O lona uiga, o tulaga uma lava e tulai mai i le pue, e sala, o le ala lena o lea e sala soo ai tatou tama, o le ala lena e faiaina soo ai. E te pue loa i luga ae o le fatafata otometi lava le yellow card, ae lavea loa tuutuu ae i luga i le ua, red card loa. O le mea lena ua autasi i ai e sau lava mai totonu i le pulega i laufali. O lea la e masani ona tatou feita i laufali, a o le faatonuga e sau mai luga ona o le tulaga o le puipuiga o tama taaalo. E i ai le isi tatou tama la e paralyse, e i ai tama na feoti, i le mea lava lea o le agai tele o tatou i le sua o le ulu ae o lea e lavea ai le faiai se i tulou. A matau la i le taaloga lea na fai, le ipu lea a le lalolagi na fai i Iapani, o tatou le au na aupito sili ona tele mea o yellow cards o le mea lea. O lea la ua feoloolo lava taimi ua ou alu ai ma fai le matou fonotaga ma ou lapatai i ai, aua o lea foi na ou vaai atu i taaloga ia sa tatau lava ona malo tatou ia Ausetalia ma tatou qualify ai loa e o i totonu o le Olimipeka lea i le tausaga fou. O lau tomanatu e 14 ai na tatou ahead i ai, e tatau ona tatou malo, ae faaletonu loa le pue a isi tama e toalua ave uma i tua. E le mafai ona malo se au pe afai na o le toalima ae toafitu le isi au. O le mea la lena o lea e tupu nei o le taumafai e discipline tatou tama, o le tulaga faigata lena o lea e faafeagai nei ma coaches ia e i ai nei. Ma e fai sina umi o lau tautalaga ma le tulaga lava lea o tatou coaches se i vaai i mea o tualga iloga o mea nei o taaloga. E fai si umi o lau tatalaga i ai, o coaches uma lava aemaise lava le taaloga lea na fai nei a le lalolagi lea na siamupini ai le au lea a Aferika i Saute, a matau lelei i le togafiti na fai, e faigofie lava, na o le kiki, kiki, kiki, kiki lava i taimi uma na ona vaai atu lava ua lalata i le uma panic loa ma Egelani, oti atoa ma latou plans, tasoo loa i ina ma sikoa a Aferika i Saute. A o le kiki lava. E oo foi ia Niu Sila. A outou vaai ia Niu Sila, o le mea lava lea e piki a le tagata kiki. E tele taimi e malo ai Niu Sila, na o le kiki lava, e i ai taimi e malo ai leai se sikoa ae na o le kiki lava. O le mea lena o lea ou te ofo ai i a tatou coaches, ua tele tausaga e le i tautaua a se isi i ni kiki. A ou talanoa i le kiki, afai e fitu conversions e fitu foi ova, ae le o le ova o le lua ona faapea lea, lena ua manaia.

Lau Afioga i le Fofoga Fetalai, ia leaga o lea na fesili isi i le lakapi, o le tulaga lena. O lea lava e taumafai, o matou nei e malamalama i lakapi, ma taalo lakapi ae le malamalama ai tagata e le i taalo lakapi. Ia manuia le tatou Fono.

FOFOGA FETALAI: Ua faamalo saunoa i lau Afioga i le Palemia. E i ai le manatu o le Nofoa ua manino auofala, ua malamalama vaipanoa eseese i le saunoaga matagofie a lau Afioga. E momoliai le faamalo ma le faafetai, o lea foi ua faafofoga le Maota, sui usufono mamalu o le Maota faapea foi le tapuaiga a Samoa i le faafogafoga mai. Ua taoto atoa le ata, afua mai lava i le taumafaiga i le amataga 2016 se i tau mai i le aso. O lea ua faafofoga le atunuu, malo le fai o le faiva, faamanino foi nisi o mataupu e faapena ona fesiligia ai e le atunuu i le tulaga o le atinaeina o lo tatou Malo.

O lea ua toe 5 minute ona ta lea o le tatou taimi malolo ae lelei ona tuu atu le avanoa lea i lau Afioga. Lau Afioga i le Minisita o Fesootaiga, e te amatamea e pei ona saunoa i ai le Taitai o le Maota.

Saunoa lau Afioga i le Minisita.

Afioga Hon AFAMASAGA LEPUIAI RICO TUPAI (Minisita mo Fesootaiga, Faamatalaga ma Fesootaiga Vavave Faaneionapo): Faafetai i lau Afioga i le Fofoga Fetalai, na ou faapea o le a e tuu maia ou te faia atua le lotu i lenei afiafi. Ona e feoloolo lava nai mataupu na lagalaga e sui usufono mamalu o le Maota, o le latou foi matafaioi. O lea la sa ou faavasegaina analeila, e 21 minute 10 sekone uma loa ma au. Ae faapea o le a lou finagalo ae tatou amata lelei taeao. Ua ou vaai atu ua leva ona genogeno mai le itu le la a Falealili ma Vaimauga i Sasae..

SUI FOFOGA FETALAI: Ua manatu le Nofoa, ua talafeagai lea, ua alofa atu foi, ua leva ona faaaaogagase le Maota. Ua tatau foi ona tatou malolo, suesue malosia aua le aso a taeao.

Ae tatou te le i tolopo, e i ai le manatu e fia momoli atu pea le faamalo ma le faafetai i sui mamalu uma o le Maota. Malo le tofa, malo le uta, sologa manuia Fonotaga i lenei aso ona o lo outou faatamalii, ma outou silasila i le tapuaiga a si o tatou atuuu. Ia faamanuia le Atua. A taape le filialii ma tuuama le fua i lenei afiafi, malaga i lagi ma. Muaau ma muliau le Atua, taunuu i aiga o talimau mai i le manuia ma le filemu o le tatou Alii.

Ou te tapa ma le faaaloalo le sui usufono mamalu o Salega, lau AfiogaToomata, e te faaiuina le tatou Fonotaga i se tatalo.

Na tolopo Taualumaga a le Fono Aoao i le itula e 11:00 i le po seia aulia le itula e 9:00 i le taeao o le AsoTofi, 23 Ianuari 2020.